

1 Korinti

Pauloŋo Kibi Mane Mikepka Korinti Eŋane Qeke

¹ Paulo, na Kristo Yesu wane aposolo, Anutuŋo noraki paki biranange, na so kimaze Sostenes,

² ŋeto kibi iwa Anutu wane doku tau tau magu Korinti gemami, ŋinane qemaite, ŋine korop Anutu wane ŋei ŋerep koboboine ŋidorake, ŋine eŋane biŋek okane Kristo Yesurop weneŋ gemami, ŋine so ŋei ŋerep korop yeo yeo ge arimami, eŋe bakomine kito okanmami, Waomze Yesu Kristo, eŋane waom so ŋenane weneŋ.

³ Anutu ŋenane Magaze, so Waomze Yesu Kristo eŋano ŋine wet pesek so peamŋo ŋinano pa wareake.

Pauloŋo Anutu Bakomine Kitoke

⁴ Na, naso baŋem ŋinane rawe paki Anutu ewine kito okanmaile, onoka wane Anutu eŋe Yesu Kristo wane raki paki wet pesek ŋibonge eawane. ⁵ ŋine Kristo Yesurop weneŋ qeturaŋ nagukoi, yewao ŋine yeye kine kine korop ea wane morianine maratka warekoi. Eamo don kine kine raikoi wane numaine so dereret kine kine marat kaikoi wane numaine korop. ⁶ Eso Kristo wane don ŋidangone, ea yaleka ŋinane koto ŋino ketki togogole malip kakoi. ⁷ Ea wane ŋine Waomze Yesu Kristo sari didiwo lotkeake ea wane tomaka geu paki koto ŋinane morian wane mane mi ŋaŋaekoi, midakaka. ⁸ Yesu Kristo oŋom baŋ ma togole ŋungi ŋine togogole ge mageu naso ŋine

qoeki, sot midaine okorakei, Waomze Yesu Kristo wane naso yewao, so ⁹ Anutu wet peseinane detluk kaikene, oŋo ŋidora newan ŋunge, yemo eŋine Gipole Yesu Kristo, ŋenane Waom, eŋerop wet weku qeturage gekei wane.

Doku Tautau Magu Wirikoi

¹⁰ Kimakopne, na Waomze Yesu Kristo wane eŋetko wet qelot don ŋidanmaile, eawane ŋine korop wet weku okane don raikei, yale okanbi keu ŋino wiri wiri mi wakoniake. Ŋine korop qeturageu dereret ŋine wekuka payake, so wet weku okanikei. ¹¹ Kimakopne, Koloe wane tego eŋano ŋine ŋei natne edo didiwo nolale rakoi, ŋinane keu ŋino ŋaba ŋaba pamaike. ¹² Na ramaille yemo iwa yale wane: Ŋinano ŋine ŋei weku weku eŋe don mane mane ramami. Mane eŋe ramaike, “Na Paulo wane.” me mane eŋe ramaike, “Na Apolos wane.” me mane eŋe ramaike, “Na Sipas wane.” me mane eŋe ramaike, “Na Kristo wane.” ¹³ Kristo kito pokeu magu loutne okange me? Paulonŋo ŋinane ra more kibego qeu seukke me? Me ŋine Paulo wane eŋetko doku taukoi me?

¹⁴ Na detpe menaŋmaike, yemo iwa yale wane, na ŋinano ŋine ŋei natne doku mi tau ongole, na weku Krispas so Gaius ka doku tau otkole. ¹⁵ Manenŋo iwa yale maine mi rayake, eŋe nanane eŋetko doku tauke. ¹⁶ Na Stefanos wane tego eŋe welekatne doku tau ongole, ŋo ea wane ŋadino natne doku tau ongole eamo mi detmaile. ¹⁷ Doku tau onikalane Kristonŋo mi bira nange, midakaka! Kisi Mayakatne ea ra wakone edanikalane, so kepe ŋei dereretko ŋine don yewa

mi edanikalane, yale okangole ra, Kristo kibego seukke eaŋo zonomine midaine okangirap.

Kristo Eje Anutu Wane Zonom So Dereret

¹⁸ Kristo kibego seukke, ea wane don kisi yemo ŋeiwa Kristo mi malipka suike gemami, edo detpi qelaŋine okan okanmai. No Anutuŋo ŋebu menaŋ ŋonge ŋene yemo detmaine, ea mo Anutu wane zonom. ¹⁹ Eawane Mitinjo iwa yale ramaike, “Na ŋei dereret enerop, eŋane dereretene mapap kaikale, so ŋei kepe wane dereret eawane wetene lolotne eŋane wetene ma siukkale.”

²⁰ No ŋei dereretene suaine eje diao arikei? ŋei kepe wane dereretene suaine gemami, wetene lolotne, so Anutu wane kine detlukmami, eje diao arikei? Me kepe iwa wane ŋei sorin borin gorop gemami, eje diao arikei? Anutuŋo sikan ŋonmai. yemo kepe iwa wane ŋei eŋane dereret qelaŋine, ea mo wele midaine.

²¹ Anutu eje eŋine dereret inane masi yale maki kepe ŋei eje qelaŋ qe more enŋene wet bonop enane Anutu mi detkakoi, ea wane, Anutu eje mo rake, ŋene kisi mayakatne ŋidanmaine ea “qelaŋ don ramami,” det lukkamami ŋei yewa korop Anutuŋo ebu okan maike. ²² Yuda ŋei eje masi togole maki kau qelaŋaniakane sorin gemami, eso Grik ŋei eje dereret marat kaikei wane zuaŋmami. ²³ Eso ŋedo yemo ramaine, Kristo eje kibego seukke ea welerop, ŋo don yewaŋo qeki Yuda ŋei eŋane dereret borike, ŋo Grik ŋei edo detpi qelaŋ don, wele midaine.okange. ²⁴ No ŋei Anutuŋo ŋedora newan ŋonge, Yuda ŋei so Grik ŋei, ŋene yemo

detmaine, Kristo wekuku eŋe Anutu wane zonom so dereret.wele. ²⁵ Welekatne, Anutu wane qelaŋ rau, qelaŋine eaŋo qeinge more ŋei dereretene yuan kamaike. So Anutu wane set pelek rau, set pelekine eaŋo qeinge zonomine togogole okane ŋei eŋane zonom yuan kamaike.

²⁶ Kimakopne, ŋine iwa desikei, ŋine daleo geu Anutuŋo ŋidora newan ŋunge? Ŋinane keu ŋino ŋine ŋei loutneŋo kepe iwa wane kine mane mi detkakoi, me ŋei loutneŋo zonomene kakapa mi gekoi, me ŋei loutneŋo eŋet enerop mi gekoi, midakaka! ²⁷ Anutuŋo ma wakonge iwa yemo kepe ŋei eŋe “qelaŋine” rau mo don yewaŋo ŋei dereret korop, eŋe gamu oniake ea wane, so Anutuŋo ŋei ŋerep set pelek so gamuenerop ma wakon onge, iwa yemo kepe ŋei eŋe “set pelek” rau mo don yewaŋo ŋei zonomene kakapa eŋe zonomene ma ketki gamu oniake. ²⁸ Ŋei ŋerep diawa Anutuŋo eŋane biŋek ma wakon onge? Yemo iwa yale, kepe ŋei rau yauine so ketkele, ŋei ŋerep eaka, Anutuŋo biraongi eŋane biŋek wele okanmami, masi yewaoka kepe ŋei wane dereret qe ket mida lele siukeake. ²⁹ Okange, yemo iwa yale wane, ŋei maneŋo Anutu wane kaitko mi mawa naguyake. ³⁰ Ŋo Anutuŋo yemo ŋebu teba ŋongi Kristo Yesurop qeturangone, pakiso Anutuŋo Kristo ŋenane dereret zane kine birakake, eŋane ra more ŋene Anutu wano bira ŋongi ŋene Anutu wane ŋei ŋerep magu koboboine okangone, sogine ŋene sot korop gekone, ŋo naso iwao siwot ŋone more biraŋongi, sot midaine gekene. ³¹ Eso, ea wane Kisi Mayakatneŋo iwa yale ra-

maike, “Mane enje mawa naguwe ra Anutuŋo daleo okankake ea wane ma wakayake.”

2

Kristo Kibego Okorake Ea wane Kine Pauloŋo Edange

¹ Kimakopne, na Anutu wane san qabuine wele ea ŋidanikalane ŋinano sarikole, naso yewao na don kiroroine so dereret suaine ea ra mi ŋidangole. ² Na ŋinane keuo ge more na wetne maingewe paki yeye kine kine qeligewe niget nangi Yesu Kristo kibego seukke, enjeka weku detka kalane wetkekole. ³ Eso na ŋinano sarikole, naso yewao na zonomne midaki, kaet okanbe zonomne korop oreke. ⁴ Pakiso na don rakole so Kisi Mayakatne ra qelanane ŋidangole, ea na ŋei dereretko ŋine mi ma more ŋidangole, so wet ŋine maingeu paki nanane don desikei wane, midaka, na Anutu Asuinane zonom ea ra wakone sikan ŋungole. ⁵ Ea wane ŋinane wetŋo ŋei dereretko misuk motpi payake, midakaka! Anutu wane zonomgo motpi payake.

Anutu Wane Asuŋo Dereret Ŋebon Okanmaike

⁶ Welekatne, na don dereret inerop ea wane kine ra wakone, ŋei mo Anutu wane zonomgo togole gemami, enje edan okanmaile. No eamo kepe iwa wane dereretine midakaka, me kepe iwa waremami enane zonom, eamo midaka. Zonom me dereret yewa mo kieke mida lele more siuk wareake. ⁷ Na dereret pa ra wakone ŋidanmaile, yemo Anutu wane dereret sane, motkeki sankaka pa sake, Anutu enje mo ŋenane qeli ewe zonom

okaniakane mokaka kepe iwa mi ma wakonge yewao binjek qeke. ⁸ Kepe iwa wane nei waomine enj dereret iwa mane mi detkakoi. Enj ea mane detkakoi ra yemo enj geli ewe zonom wane Waom kibego mi qeurap. ⁹ Ea wane Anutu wane papianjo iwa yale ramaike,

“Yeye kine kine denjo mi kakaine, me ketjo mi dereretne, me nei wetene lotkeki mi detkoi, kine kine yewa yemo nei korop Anutu wetjo qotka lukka more enjane detpi wele lele okanmaike, nei yewa enjane binjek ebonge.”

¹⁰ No njene yemo Anutu enjine san qabuine kine enjine Asuinejo ra wakone nedange, Asujo yeye kine kine korop ka waremaike, so Anutu wane san qabuine kine qeijop ea yaleka kamaike.

¹¹ Ma nejno nei mane wane wetinane kine desiake? I midakaka! Nei wane enj enjine wetino metmaike, onjomka enjane kineine det kamaike, rokop yale waka nei maneno Anutu wetinane kine mi desiake, Anutu Asuinejo ka weku Anutu enjine wetinane kine korop det wareake. ¹² Nene Asu pa nebonmaike, iwa mo kepeo nei enjano njine mi makone, njene Anutuno Asuine nebonji makone, ea yemo Anutuno njene kine kine korop nebonge, ea wane maine detluk kaikenane okan njonge.

¹³ Eso ea wane njene kepe nei dereretko njine don mi ra njidanmaine, midaka! Nene Asujo dereret nebonmaike, paki, njene don wele ea wane kine ra qelanjane more nei Asurop gemami, enj edanmaine. ¹⁴ Nei mane Asu midaine geake

eŋe Anutu wane Asu eŋano ŋine bakom sari-maike, ea mane mi mayake. Onoka wane ŋei yaline eŋe don ea wane kine welekatne mi dere qelaŋan kamaike, ea wane, pakimo don yewa detki qelaŋ don wele midaine okaniake, eamo, Asurop ŋoku dereretne okanmaike. ¹⁵ Ŋei Asurop eŋe yeye kine kine korop dere wesakkei, ŋo ŋei Asu midaineŋo ŋei Asurop eŋane kine maine mi desiake, ŋaŋaeyake. ¹⁶ Ea wane Anutu wane Papiango iwa yale ramaike,

“Maŋo Waom wet bonepinane don detmaike?
Maŋo eweke more Anutu numa sikankaki
desiake?”

Ŋene Asurop, yemo Kristo wet bonepinane don ma gemaine.

3

Anutu Wane Qelit Ŋei Eŋe Doku Tautau

¹ Kimakopne, na ŋei Asurop eŋe don edangole, yale ŋine don mi ŋidangole, midakaka! Na don ŋidangole yemo ŋine kepe iwa wane ŋei Asu midaine eda edane yale ŋine Kristo wane ŋei ŋerep medep okanbi ŋidangole. ² Na ŋamuka gume ŋungole, ŋara togole mi ŋibongole, onoka wane, ŋine ŋara togole nekei wane rokop mi okangoi, so naso iwao yaleka ŋine ŋara togole nekei wane kop mi okanmami. ³ Onoka wane ŋine kepe iwa wane ŋei yale, Asu midaine, wet dereret ŋine soginerop gemami, ea wane dere worik keu ŋino paki ŋine ŋidomka sori sorin okan nagumami, Ŋine tanik yale okanbi, eaŋo kine qe wakonmaike, yemo ŋine kepe iwa wane ŋei

yauwine okane more ea wane zonom so dereret korop gemami. ⁴ Ea wane, ñei mane eñe ramaike, “Na Paulo wane ñei,” eso mane eñe ramaike, “Na Apolos wane ñei,” ñine yale okanmami, wane kepeo ñine ñei yauwine yale gekei me?

Anutuño Mosopkaki Wele Wakonmaike, Eñaneka Raikene

⁵ Apolos eñe ma? Ño Paulo na ma? Ñere Anutu wane qelit ñeika, ñeto miti ñidante ñine detkoi, ñere Anutuño urata ñeponge ea wane rokop bonep bonep makote. ⁶ Na waet ebotkole, ño Apolosño ñara wele ware more doku qakonge, ño Anutuño mosop kaki wele wakonge. ⁷ Ea wane waet ebotke eñane, me ñara wele ware more doku qakkake, eñane mi raikene. Mosop kaki wele wakonmaike Anutu weku eñaneka raikene. ⁸ Waet ebotmaike, ñei yewa so ñara wele ware more doku qak kamaike, ñei yewa ere kine etne wekuka. Anutuño bañ urata mama etnane rokopko lewine bonep bonep mapoke eponiake. ⁹ Ñere urata mama ñeiño Anutu wane urata qeturage mamaite. Eso ñine yemo Anutu wane eu, so ñine Anutu wane mat, mo oñom ma wakonñunge.

Gerepño Urata Wane Kine Maki Wakoniake

¹⁰ Anutuño wet pese inane urata more ñinge, rokop na mat mama weleno simen bosin birawe ketke. Pakimo ñei maneno simen bosin ea wane kutno takotke more mat mamaike. Ñei ea wane kutno mat daleo maikei, eñe kauluke detluk nagu more maikei. ¹¹ Anutuño simen

bosiŋ weku Yesu Kristo, mo bira kaki ketke okoramaike, ea lokake bira more ŋei manenjo koso bosin pelekine mane musele biraki ket ket eamo mi pamaike. ¹² Ŋei natnenjo ban gol, me silwa, me wesi lewine suainenjo bosin ea wane kutno mat maikai, ea welerop, me natnenjo eki, me seqa, me rais setnenjo mat maikewo, ea wele midaine. ¹³ Yemo ŋei mat mama enane kine ban nado Kristo wane Kaiwe Naso bomileki, kineze yewao didiwo wakongi kaikene. Kaiwe Naso yewa wane gerepnjo lawe more ŋei urata mama enane kine qe wakoniake. Gerep yewanjo ban urata ea liwekkaki paki ea wane weleine maine me mida yewa sikan nongki kaikene. ¹⁴ Ŋei simen bosin yewa wane kutno mat make ea gerepnjo ze ari yuankaki mesiakeo urata ŋei yewa ene ban gege togon so lewine mayake. ¹⁵ No mane ene mat urataine make ea gerepnjo ze wareki midayakeo, ene urataine mo yewa mida leleyake. No ŋei enine yemo silun ban sese kayake. Seseke more gerepko ŋine makokka, gege togon marat kayake, no lewine mi mayake!

¹⁶ Welekatne, ŋine Anutu wane Bakom Urum, ea wane Anutu wane Asunjo koto ŋino gemaikene, ea ŋine mo detmami! ¹⁷ Yalinane ŋei mane ene Anutu wane Bakom Urum yewa matali kayakeo, Anutuŋo ŋei yewa ene yaleka matali kayake, Anutu wane Bakom Urum yemo koboboine, eso Bakom Urumine yemo ŋine.

Ŋei Mane Enetne Ora Misuk Mawakaikene

¹⁸ Ŋei mane onomka misuk isi naguyake, ŋei mane ŋinane keuo ŋine ene kepe iwa wane tanik

manik ea mogare geake paki wetineŋo, “Na ɲei dereretne weneŋ,” yale wetkeakeo, eɲe mikepka dereret ea qelige more ɲei qelaŋ okaniake, yale okane more dereret wele marat kayake. ¹⁹ Onoka wane, kepe iwa wane dereret eamo Anutu wane deino yemo qelaŋ masi okan okanmaike. Ea wane Anutu wane Papijaŋo iwa yale ramaike, “Waom eɲe ɲei masi borikinane dereret suaine ma gemami, ea eɲe koso Waomɲo maingeki enɲene edot okanmaike.” ²⁰ So Anutu wane Papijaŋo mane iwa yale ramaike! “Waom eɲe kepe ɲei dereret enerop eɲane wet dereretene detki wele midaine okan okanmaike.” ²¹ Ea wane, mane eɲe ɲei mane misuk ora ma wakayake, midakaka! ɲine ɲindanbe detpi menageake, yeye kine kine kepo pamaike, ea korop mapit ɲune more Waomɲo motke. ²² Iwa yale weneŋ, Paulo, me Apolos, me Petoro, me kepe iwa, me gege, me seuseu, me yeye kine kine iwa pamaike, me kine kine baŋ ɲado wakoniake, yeye kine kine iwa korop ɲinane mali malip mapit kayakane biɲek Waomɲo motke. ²³ Eso ɲine yemo Kristo wane biɲek, ɲo Kristo eɲe Anutu wane biɲek.

4

Waom Eɲe Kisi Mayakatne Rara Eɲane Kine Mawakoniake

¹ ɲine ɲerane, na so Apolos detpi Kristo wane urata ɲei, so Anutu wane Don Sane Wele ea wane ware wareine okanikete. ² Ware ware eɲe koboboine geki paki suaine inane urata wele ka more kauluk qeuluk mayakane ra mange. ³ Na,

nae wane yemo iwa yale, njido me nei magu nat-
 nenjo nanjane gegenane kine rau na ea detpe wele
 mi okaniake. So na nojom kinene yaleka maine
 mi rakale. ⁴ Na wetne ululun pamaike, sotne
 mane mi paki detmaile, no silun na yale rawe
 eaŋo na welekatne sotne midaine, ea wane kine
 mi ge wakonmai, na nojom “sotne midaine,”
 yale rawe mi kopkeake. Waom onjom nanjane
 kinene ma wakoniake. ⁵ Ea wane njine nasoine
 mi bomileki kine ma wakon ma wakon wane
 kukka mi okanikei. Njine silun kine ma wakon
 ma wakon weleine Waom tomaka mageu sari-
 ake. Sari more Waom onjom yeye kine kine sane
 korop panaman koto siuke pa waremai, yewa
 ban ge wirikki didiwo wakon wareake. So nei
 enjane kotoeno kine kine siuke san pamaike, yewa
 korop ma wakon wareake. Pakimo, Anutuŋo
 nei korop rokopene detongi paki ea wane kop
 ban nei bonep bonep mawa one more bakomene
 kitoyake.

Korinti Nei Eje Wawaine Zok Okangoi

⁶ Kimakopne, na njinane dereret qesiŋka more
 nae so Apolos njetsane koso takotke more don
 iwa yale ramaile, njine njerane kine kau paki
 detluke more Kisi Mayakatnane “gege wane
 numa mayakatne miti don sogine raraine,” kop
 ea misuk yuane more wawaine okane nei mane
 wane detpi waki mawa kaikei, eso mane wane
 detpi ketki ma ket birakaikei. ⁷ Ge maŋo, nei
 yuanone more suaine gekenane ra biragange? Ge
 yeye kine kine korop ma gemaine, yewa Anutuŋo
 mi ginge me? No ge Anutu wano njine kine kine

mane wele ea welekatne makoneo, mo ge onoka wane detnom mi ginge yale okangi mo mawa nagumaine me?

⁸ Njine wetjinejo mawa nagu more ramami, “Nene yeye kine kine mayakatnane mi njanjaine, ea mo korop ma ge waremaine! Nene mo abonj morian gorop okan waremaine! Nene mo nej waomka okan waremaine, jo aposolo, njine yemo mida! Maine, njene welekatne nej waom ka okan waremaine” Na yaleka ramaile ea welekatne njene njinerop wenen nej waom okanjem rap me? ⁹ Yale mida! Na kamaile, Anutujo Aposolo njene nej sinoine yaline qelan nej enane keuo biraone yale okanmaike, njene nej yauine seuseu wane binjek ra bira onmami, yaline, biraonge, pakimo, kepe banjem nej korop, so anelo enane deeno njenguwi seukkenane okanmaine. ¹⁰ Njine wetjinejo mawa nagu more ramami, Kristo wane ra more njine, aposolo magu, nej qelanine okanmami, jo njine Kristo wano takotkenjem paki, dereretze korop okanmaine. Njine setjine pelelekatne, jo njenze yemo zonomze togogle! Nene enet binjekzerop, jo njine, aposolo, yemo ket qeqine. ¹¹ Njine njara zane seukkone jo seuke gemaine, so doku zane qomze sererekkenjo sererekmaike, njene takot laplap midaine gemaine, njengu matali qetali okan nonmami, mat urumze midaine lobo lobo gekone so gemaine. ¹² Njine njenze qesinj nagukenane metezenjo urata togole ma okanmaine. Eje mabaik nonbi njene qesijone more mosopon okanmaine. Eje matali qetali okannonbi njene turujene qelinj okanmaine.

¹³ Eje don borikine n̄edanbi, n̄ene kimao don pelekine edan okanmaine. N̄ene kepe ban̄em eṅane sino yale okangone gemaine. N̄ene n̄ei korop eṅane kaitko yale okane, ge sakone ge sari magen̄em, ukude naso iwa okanmaīke.

¹⁴ Na don iwa n̄inane q̄emaile, ea mo detpi gamu n̄uniakane midakaka! N̄ine nan̄ane medep maepkopne okanikei wane wet̄ine kito wirike n̄idanmaile. ¹⁵ Ea wane welekatne n̄ine diam gege kop n̄ine aṅelo 10, 000 mane ge more gege n̄ine warekau Kristo wano payakeo, yemo siluṅ n̄ine maga n̄ine yale waka weku geake. N̄o siluṅ n̄ine magakop̄n̄ine loutne midaka. Ea wane mo n̄inane gege n̄ineṅo Yesu wano pamāike. Na Kisi Mayakatne n̄inano ma sari n̄idangole, yewao na n̄inane magan̄ine okangole gemaile. ¹⁶ Pakimo noṅo numa gesoke okangole, yewaka mogare okanikei wane q̄ebin n̄unmaile. ¹⁷ Ea wane rawe paki na Timoti birakawe n̄inano uke. Nan̄ane medep maepne, na eṅane zok nan̄ okanmaīke so eṅe Waom wane urata maine mauluke ma okanmaīke. Oṅo ban̄ wet̄ine q̄e wirike more noṅo Kristo Yesu wane numa ea mogare ari doku tau tau magu korop mat ban̄em ra edan okan okanmaile, ea wane numaine n̄idangi desikei.

¹⁸ N̄inano n̄ine natne wawainenerop eṅe Paulo mi sari n̄oniake nan̄ane yale rau paki raki ra okangoi. ¹⁹ Na yemo welekatne Waom̄o detki mi azoṅgi n̄inano ukale, numaze raki ra okan okanmami, eṅe don ra okanmami ea mida, zonomene ea wane den̄eṅoka kine ma wakonikale. ²⁰ Anutu wano n̄ine numa ea wane kine yemo don̄oka

raki ra wane bijek, ea midakaka. Eje zonom so togole togoleo kine wakon okanmaike. ²¹ Pakimo njine nanane daleo ramami? Na njinano kumunam gorop ukale me momoine wet menago pesekine ukalane ramami?

5

Mado Madojine Wakone Pake

¹ Njinane keu njino borikine mado madojine njerep kobu wakonge pamaike, yale rau det okanmaile. Borikine manerop, qelan enano mi wako wakone. Nei maneno magainane njanom inerop maki gemamik. ² Pakimo, njine onoka wane kine kine yaline wakone paki wawaine zok okanmami. Njine gom borik dere more jei masi ea okange eje qelinkau rap me? ³ Na solaneno abaran gewe paki asuneno mo njinano lotke, jei mado madojine okange, enane don keu njino nojom solarop ge more qou mo rakok kakole. ⁴ Njine Waomze Yesu wane enetko wekuoka qeturage lewageu na Waomze Yesu wane zonomgo asuneno njinerop wenen mesikene. ⁵ Pakimo njine jei yewa solaine Satan sunka manbi qe mataliki wetine zingeki, borikineine ea kaki paki koso solaine zinge, magu koto takotkeki rap. Eso onane yemo ban gemage, Waom Yesu wane Naso yewao seseka more ma qeliwo birakaki rap.

Kine Kine Tabaine Qelige Nenine Magekene

⁶ Njine wawaine okanmami, yewano maine mi okanmaike! Yis nigatatne yewano maki palawa korop yewa sua piwiwige wie bret okanmaike. Don yewa raraine, njine mi detmami me? ⁷ Njine

yemo palawa yisine midaine yale, ea wane ñine yis sogine borikine sot korop yewa ma birau ariki ñine bret musele libeka okanluke yisine midaine maine gekei. Onoka wane, Ñenane Lama sesenone yuan ñoniakane soe soep mo qekoi, yemo Kristo. ⁸ Ea wane ñene peadaine mesikene nane yis sogine, borikinane sot korop, yis so tanik manik qotkoine, yewa qeliñ ware more, bret yis ine midaine, bret kilu kilutne sot midaine so wele yewarop gekene.

Borikine Mama Qeli Ñonikene

⁹ Na kibi mane qekole, yewao iwa yale rawe paki qe ñibongole, ñine ñei wa bailalañ okane more ñerep ebu okanmami, eñerop kine kine ne amanagu so weneñ misuk gekei. ¹⁰ Na rakole yemo kepe iwa wane qelañ ñei korop bailalañ okane more ñerep ebu okanmami, me kine kine nugunge okanmami, me bailalañ okane ñei natne eñane yeye kine kine kobu ma okanmami, me waom isisine mageu paki qelitine qe okanmami ea qeliñ warekei wane mi rakole. Ñine qelañ ñei ñerep iwa qeliñ warekei wane mi okaneso, ño eñane masi tanik qotkoine qeliñ kaulukei. ¹¹ Na kibi qe ñibongole, yemo kine iwa yale wane, ñine ñei mane eñe “na doku tau tau magu gemaile,” rayake, ño eñe bailalañ okane more borikine mayake, me qomine riweki ñei mane wane yeye mane mayake, me waom isisinane qelitine qeake, me ewe mabaik okaniake, me wet siuk doku neake, me eñe ñei mane wane yeye kobu mayakeo yemo ñine ñei yaline qeliñkau paki enerop ñara ne amanagu misuk okanikei.

¹² Ea nanane urata wane nei qelan ḡadine gemami, eḡane sot don nonḡo raikale me? Njine ḡinḡine keu ḡino sigi maep dere kotino gemami eḡane sot don mi raikēi me? ¹³ Nei qelan ḡadino gemami, eḡane sot don yemo baḡ Anutuḡo rayake. Ea wane Waom wane don mane iwa yale ramaike, “Njine nei borikine mama ea keu ḡino ḡine esop kau saket ariake.”

6

Doku Tautau Maneḡo Kimaine Mane Qelan Eḡano Dongo Misuk Birakayake

¹ Njanane keuo ḡine nei mane kimainerop don sotetne payakeo, eḡe miti nei ḡetne eḡano ari don mi rara, eḡe ware ware qelanine eḡano don ma ari raki menageake me? Mi kopkemaikē. ² Anutu wane sigi rara nei ḡedo gemage kepe baḡem nei korop eḡane don rakokkene, ea mi detokanmami me? Eso gemage kepe baḡem nei korop eḡane don ḡido rakokkeiwane pamaikēo, ḡinḡino don kaki nigatne yaline wakongi ḡidomka rakokkei wane, rokop mi okanmami me? ³ Nedo Naso Suaino aḡelo eḡane don baḡ rakokkene, ḡine yewa mi detmami me? Nene eḡane don baḡ rakokkene. Ea wane mo ḡene kepe iwa wane gege mage wane done maine rakokkene! Nenze kine qelan edo maine mi rakokkei. ⁴ Ea wanemo ḡinano kepe iwa wane don yawwine mane wakonmaikēo ḡine onoka wane don sot yewa ma ari nei qelanine eḡetene doku tautau maguo mi pamaikē eḡano motpi edo don sot yewa rakoke ḡibon okanmami me? ⁵ Na don iwa rawe detpi gamuḡuniakē.

Welekatne ninano don sot dereret nei mane mi gemaike me? Pakimo don sot nine wakongi enano ma ariu onjo ra koboe njongirap. ⁶ Yale okanikei, yemo maine, no nine nei kima mane eje kimaine mane nabaka more dongo birakayake, pakimo eje nei mali malipene midaine enane kaiteno okora don raki don sotine rakoke manikei, masi ea mi menanmaike.

⁷ Nine don sotninane kima njidomka qelan masi dongo bira nagu okanmami, yale okane nine mo peleke ket gemami, onoka wane qeligeu eje masi borikine maine okanunbirap? Onoka wane qeligeu eje kine kine nine kobu maine maurap? ⁸ Nine yalewa okanikei, yalemo koso nine njidomka masi borikine okannagu okanmami, so kine kine nine kobu ma auye modatnagu okanmami, nei yauwine noku midakaka, silun miti dereret kimakopnine wenen yale okanon okanmami. ⁹ Borikine mamaŋo Anutu wane gege togon mat kotino wake waket yemo mi pamaike. Nine don iwa mi det okanmami me? Nine wetjineŋo misuk isinagukei. Nei wenip ma okanmami, me waom isisine enane don teweke ma ge okanmami, me nei nanowekopene qelione nrep natne ebu okanmami, me nei natne neiŋoka nrep yale borikine au okanmami, ¹⁰ me nei kobu mama, me wetno nei enane abon kine kine enane bailalanine wetke ma ge okanmami, me wet siuk doku ne more qelan qeŋe, me ewe mabaik don ra okanmami, me nei engu matali one mat kito barake abon kine kine kobu ma okanmami, nei yaline korop eje Anutu wane gege togon qeli mat kotino mi wakesikei. ¹¹ Ninanonine nei natne

alakan yaline okane gekoi, ɲo iwa yemo sot borikine ɲino ɲine mo saukɲunge, so wetɲine ma qelaɲane Anutu enjine biɲek ɲibuke. ɲine mo ɲei koboboine enjɛt ea makoi, yemo Anutu zane Asuɲo Waomze Yesu Kristo wane ramore yale okanɲunge.

Solazeɲo Anutu Ewine Kitokene

¹² ɲei natne enjɛ iwa yale ra okanmami, “Yeye kine kine ea nae simile korop na maine okanikale.” Don ea maine ramami, ɲo siluɲ yeye kine kine korop yewaɲo ge maine mi qesiɲgangi geulukene. Ge kine kine ea korop maine okan warekene, ɲo yeye natneɲo ge ɲei waom okan gangi enjane qelit qeɲe yemo mayakatne midakaka! ¹³ Welekatne, ɲei natne ramami, “ɲara osomɲo qom wane biɲek, ɲo qomɲo ɲara osom wane biɲek.” ɲo baɲ gemage, Anutuɲo eretnarek matali otki siuke mida lelekeik. Sola yemo bailalaɲ mama wane biɲek midakaka. Yemo Waom wane qelit qeakane biɲek. ɲo Waomɲo yemo sola wane welaine. ¹⁴ ɲine maine misuk niget ɲuniake, Anutu ɲo Waom Jesu seu seuoɲine ma wisikae kaki wieke, yalewaka ɲene baɲ enjine zonomineɲo ma wisikae ɲoniake.

¹⁵ ɲine solaɲine yemo Kristo wane sola piwitne, yewa mi detokanmami me? Pakimo na solane Kristo wane sola piwitne yewa maine birakawe bailalaɲ mama wane qelit qeake me? Yale midakaka! ¹⁶ ɲo ɲine qelaɲ geu paki iwa yale raokanbi, “na maine wenip ɲerep mane yaup maine maikale,” yewa korop zok midakaka. Na ramaile, ea enjɛ sot korop okanmaike. Waom

wane deino nire wenip n̄erep mane ēnerop qe-turañbit paki ere solañitne weku okangeit. Nu-mainne mi pamaike, ea mo sot korop okanmaike. Ea wane Anutu wane miti dongo iwayale qeqine: “N̄ao n̄anom ere etkeño weku okane gekeik.” N̄ine wawaine makei, n̄ao n̄anom matalimami. ¹⁷ N̄o mane ēje oñomka Waom wano makatakki ere asuño weku okangeik.

¹⁸ N̄ine wenip yauyaup mama yewa kakakon warekei. N̄ei mane ēje borikine natne korop mayake ēje solaine tewino okanmaike. N̄o wenip yaup qazan mayake yemo kotine so solaine weneñ matali kayake. ¹⁹ N̄ine solañine yemo Asu koboboinane urum. Ēje sola n̄inane kotino mere kito okane geakane, Anutuño more n̄ibonge, yewa mi detmami me? N̄ine sola so koto welaine midaka. Anutu weku oño welaine ²⁰ N̄ine mo Anutu ēje lewine kakapa suaine yewaño qolenonge, ea wane urata kine kine korop ma okanmami n̄ine sola so kotonineño Anutu ēnetine ora mawaka more ewine kitokei.

7

N̄ao N̄anom Ējane Don

¹ N̄ine kibi more nine don wane qeson nangoi, ea wane mo iwa rawakone n̄idanbe detpi.

N̄ei mane n̄erep midaine gewe ra, mainne geake, ² n̄o siluñ borikinane liwe liwekine zok manerop pamaike, ea wane n̄ei bonep bonep ēje n̄anomine mayake, eso n̄erep bonep bonep ēje yalewaka n̄aone mayake. ³ So n̄ei ēje solaine n̄anomine mi ma wuluke maniake, eso n̄erep ēje yaleka,

solaine n̄aone mi mawaluke maniake. ⁴ N̄erep ōnomka solainane ware ware mi gemaik̄e, mi-daka, n̄eīno wenēn̄ gemaik̄e, rokop yalewaka n̄eī ōnomka solainane ware ware mi gemaik̄e, n̄erep̄no wenēn̄ gemaik̄e. ⁵ Ea wane n̄ao n̄anom n̄ine sola ma waluk ma waluk qazan̄ misuk okane more mane solaine mawaluke maniake. Welekatne mēn̄emēn̄ wane ewekeu paki yemo lewine done auye dere more naso bamgo motpi paki tau qe more mēn̄enk̄aik̄ei. Qoeki koso solan̄ine qeturangei yemo maine. Naso midaine qazazan̄ka okane solan̄ine mi mauluke warekau Satan̄no yewao takotke more liwekn̄uniake.

⁶ Na don iwa ramaile, yemo n̄idom remi ea wane mo wetpeseko n̄idanmaile. Na ratogole n̄ibone more mi ramaile. ⁷ Nan̄ane simile yemo n̄eī n̄erep korop n̄ine na gemaile yale geurap. N̄o silun̄ n̄eī bonep bonep ēne Anutūno wet maep okane ebonge, n̄eī mane ēne n̄erep midaine qaluwit geakane raki ea menageake, n̄o mane ēne n̄ao n̄anom geakane Anutu ra mangi, ēne earop geki menageake.

N̄eī Qaluwit, Mala So N̄ao N̄anom Ēn̄ane Don

⁸ N̄eī qaluwit so n̄erep natawen so n̄erep mala ēn̄ane yemo na iwa yale ramaile, ēne na gemaile yale okane n̄ao n̄anom midaine geu menageake. ⁹ N̄o ēne kotoene so solaene mi mauluke ware k̄aik̄eiwo yemo ēne silun̄ n̄ao n̄anom gorop okane gekei. N̄aorop n̄anom gorop okane more gege yewan̄o mayakatne, yewa midaine yemo bailalan̄ wane qom n̄ine zok riweake.

¹⁰ No ʻnao ʻnanom ʻninane don rawe detpi. Ea nanane don mida, iwamo Waom wane don. Iwa yale, ʻnerep mane eʻe ʻnaone misuk qeliŋka ariake. ¹¹ Me ʻnaone mo qeliŋka ariakeo, yaup ʻnei midaine geake. Me midao yemo eʻe koso ʻnaonano ariki kima okane gekeik. Eso ʻnei eʻe yaleka ʻnanomine misuk qeliŋkayake.

Nao ʻNanom Amego Gege Wane Don

¹² Nao ʻnanom natne ʻninane don iwa rawe detpi, Waom wane don misuk okaniake, yemo nae don okaniake. Nao ʻnanom sogine qelan geu paki so ʻnei ea miti doku tau tau taukake, ʻnei ea eʻe ʻnanomine qelan geake, eso ʻnerep yewanjo ʻnei waerop geakane kaki eʻe misuk qeliŋkayake. ¹³ Me doku tautau ʻnerep mane yalewaka eʻe ʻnaune qelan geake, eso ʻnei yewanjo ʻnereppaerop geakane kayakeo, eʻe misuk qeliŋkayake. ¹⁴ Onokawane ʻnaone ʻnei qelan eʻe ʻnanomine doku tautau wane mosop ʻno eʻano mo wake, so ʻnanomine ʻnerep qelan eʻano ʻnaone doku tautau wane mosop ʻno mo eʻano wake. Pakimo ea wane ra more gipon borasokopene eʻe mosop korop okangoi gemami. Yewa midaine ra eʻane dokoene eʻe qelan geurap. ¹⁵ No ʻnei qelan maneno ʻnanomine doku tautau ʻnerep yewa qelanjo qeliŋkawe ra maine qeliŋ kayake. Masi yaline wakoniakeo, yemo doku tautau kimanine yewa ʻnaone me ʻnanomine ere mulaune midaine okanikeik, ea wane Anutuŋo peamgo kima kima okane gekenane ʻnedora newan ʻnonge. ¹⁶ ʻNerep; ge ʻnaonone miti numao waran kanom ariake me mida, me ge daleo detmaine? ʻNei, ge ʻnanomjone miti

numao waraŋkanom ariake me mida, me ge daleo detmaine?

Mane Eje Alakan Okorake, Okora Okora Yewaoka Mitiwo Okorayake

¹⁷ Nɔ midao yemo mane eje Waomɔ urata ra mange so mane eje gege ma wakone mangi geki Anutuɔ ora newankake, rokop weku yewaka mitiwo geake. Na don yale rawe paki mat banem doku tautau magu ra edan okanmaile. ¹⁸ Nei mane solaine peitne kita kitatne geki, Anutuɔ ora newankake, eje yale okangeo, yemo solaine peitne kita kitatne ea wane lopot yewa misuk qe susuakki siukeake. Nɔ nei mane eje yaup geki Anutuɔ ora newankake, eje yaup gekeo, yemo eje solaine peitne misuk kitasi-ake. ¹⁹ Onokawane, sola peitne kita kitat me mi kita kitatne yewaɔ wele mi okanmaike, Anutu wane don dere teweke mage mage yewaɔ wele. ²⁰ Mane eje urata mane ma geki Anutuɔ ora newankakeo, eje urata yewaoka ma geake. ²¹ Ge qelit qe qe genom, Anutuɔ gora newangange, ge ea wane dere mezet misuk okanikene. Nɔ ge qelit qe qe urata yewa yeine qeligenane numaine wakon maikao, siluɔ qeligenom. ²² Mane eje qelit qe qe nei mane ejane urata ma geki Anutuɔ ora newankake, eje Waom wane nei yaup geake. Rokop yalewaka mane eje yaup geki Waomɔ ora newan kake eje Kristo wane qelit nei okanmaike. ²³ Njine Anutu eje lewine kakapa suaineɔ sotɔjine qekok njungane nei ejane borikinane mulapko qelit qe qe misuk okane gekei. ²⁴ Eso kimakop, mane eje alakan miti dere ma

geki Anutuŋo ora newankake, tego yewaoka naso iwao okora more Anutu wano makatakeake.

Medep Qaluwit So Njerep Natewen Eŋane Don

²⁵ Natewen qaluwit eŋane yemo na Waom wano njine eŋane don mane mi ma gemaile. No siluŋ nae wetnoŋine don njidanbe. Waomŋo wetpesek okan nangi aŋa tewe tewek korop okan-golane donne rawe njine maine dere malipkaikei.

²⁶ Naso iwao umat zok wakom okanmaike, ea wane na wetkemaile, yemo nej eje njerep midaine mayakatne gemaike, yalewaka geake.

²⁷ Ge njerep biŋekŋone mo gekoi me? Eso ge qeliŋkaikenane misuk desikene. Ge mete kobek gemaine me? Eso ge njerep maikenane misuk desikene. ²⁸ No ge njerep mo mamaineo, yemo manom borikine mi okaniake. Eso njerep natewen mane eje nej maki eaŋo borikine mi okaniake. No nej njerep eje ŋao ŋanom okanikeiwo yemo siluŋ kepe iwa wane umat suaine baŋ kuteno wayake. Na tanik yewaŋo njinano wakoniakane mi nanmaike.

Naso Bomile Maikane Yewao Me Yewao Misuk Makatakkene

²⁹ Na iwa yale wane ramaile, kimakopne, Naso mo bomilemaike. Eso naso bamgo pamaike, ea wane nej ŋanom gorop ge okanmami, njine geu gegenjineŋo ŋanom midaine gemami, yale okani-ake. ³⁰ Eso arok okanmami, nej yewa njine geu aro midaine gemami yale okaniake. So batneka ge okanmami, nej yewa njine geu batneka mi gemami, yale okaniake. Eso abon kine kine qole ma ge okanmami, nej yewa njine geu abon

morian midaine gemami, yale okaniake. ³¹ So kepe wane abonj kine kine ea wane urataine ma ge okanmami, nei yewa njine geu kepe wane abonj kine kine mi malipka gemami, yale okaniake. Onokawane, kepe iwa pamaike, enj yalineka mi pa ariake enj siuke mida leleake.

³² Na njine yeye kine kine yauwine ea wane dere mezet mi okanikei wane nanmaike. Njerep midaine nei yewano Waom wane urata miti woken ea wane dere mezet okaniake. Paki Waom no detki menageakane rayake. ³³ No nei nanom gorop enj yemo sola okengo kepe iwa wane tanik manik ea wane dereret geake, eamo nanominejo detki enjane menageake ea wane yale okaniake.

³⁴ Yale okangi wetine wiriake. Eso njerep naone midaine me natewen mane enj yemo miti woken kine kine ea wane wetkeake paki, koto so sola koboboine Waom wano motki payakane desiake. No njerep mane naoneropno yemo sola okengo kine kine, kepeonjine ea wane dereret okaniake. Naunenjo detki enjane menageake ea wane yale okaniake.

³⁵ Na don iwa yemo njinnjine qesinjunbe maine geu lukkeiwane ramaile, qiknjunbe paki midaka. Wet dereret njine qeturageu Waom wano koropka okoraki gekei, paki mo yeye maneno wet dereret njine tebaki yau yaup mi ariake.

³⁶ So nei mane so njerep binjekine raumo, njerep so nei ere maine zokit mi makeit, waom wane qelit qe ge more urataine mogasikeik, ea menanmaike. Banj nei yewa njerep wane siminkaki so enj maine nanomine mayake, ea sot midaine. ³⁷ No nei mane enj wetinejo iwayale

ra togoleake, n̄rep mi mayake yaup geake, yale wetkeki paki detki mi qekayakeo, ēje eweke more qaluwitka geakane ra togoleki menageake. ³⁸ Ea wane n̄ei mane ēje n̄anominerop zokit maki menageake. Eso n̄ei mane ēje n̄anomine midaine zokit mi maki yemo menāj lukeake.

N̄rep Mala Ējane Don

³⁹ N̄rep mane ēje n̄aone qelīnka more koso n̄ei mane misuk mayake, eso ēje n̄aone seukmaikeo, yemo ēje koso n̄ei mane mayakane similekaki ēje maine mayake. So ēje yau yaup okane more midakaka, mitiwo Waom wano doku tautau numa yewa mogare zokit mayake. ⁴⁰ N̄o nan̄ane wet yemo n̄rep ēje yaup gemaik̄e yale wetpesek dere maine geake. So na detmaile yemo na yaleka Anutu wanon̄jine Asu ma gemaile.

8

Lopio Wane Soe Soep Mit Mit

¹ Na iwa lopio wane soe soep mit okanmami ea wane rawe, n̄jine natne wawaine ra okanmami, iwa yemo “welekatne, ea wane n̄ene mi n̄ānaemaine, n̄ene korop̄n̄o kineine det waremaine n̄ene kine kine korop̄ nekene” Eso kine dereret wane ka yemo sola mawa mawa wako-niake. N̄o miti wane wet maep korop̄ ge more ēje rau soe soep ea mi nekene, yemo wetn̄o malip nagu more togolen̄em paki, n̄ei wele okane gekene. ² Mane ēje dereretinane detki waki kine kine detwaremaile ra wetkeakeo, n̄ei yewa ēje dereret wele mi pa man maike. ³ N̄o mane

eŋe Anutu wet maep okan kayakeo Anutuŋo eŋe detkayake.

⁴ Eso lopio wane ŋara soep mire mane more ne okanmami, ea wane ŋene iwa yale det okanmaine. Lopio eŋe yeye wele mida, eŋe oŋa oŋa tewine, iwao Anutu loutne midaka, weku gemaikē, iwa ŋene detkamaine. ⁵ Onokawane, yewao kine kine loutne eŋe “anutu isisine” “lopio” oramami so “waom isisine” lopio oramamiwo, yemo Anutu isisine so Waom isisine zok loutne kepe baŋem so qeliwo pa arimamiwo, yemo welekatne. ⁶ No ŋenane yemo Anutu wekuŋo ge ŋebonmaikē, eŋe Magaze. Eŋanoŋine yeye kine kine korop wakon ware pamaikē, so ŋene eŋaneka gekene. So Waomze wekuku ge ŋebonmaikē, Yesu Kristo, eŋane aŋaineŋo raki ŋene so yeye kine kine korop wakon warekone, so ŋene eŋane ramore gekene.

⁷ No siluŋ ŋei natneŋo miti don wele iwa wane kine mi detluk okanmami. Eso ŋei natne yalineŋo “anutu isisine” “lopio” yewa eŋe yeye mane wele yale ra sa gemageu, wetene makane naso iwao eŋe ŋara soep yaline neu paki wetkeu ŋara soep yewa lopio wane okangi ewine kito more ne okanmami. Eso wetene mi qelaŋangi ne okanmami, wane neu kotoene kitoki sigile okanmaikē.

⁸ Ŋara soepŋo tebaŋone ari Anutu wane osino mi biranoniaikē. No ŋene ŋara soep mi nekeneo, yemo eŋetze Anutu wane kaitko mi kesiakē. No ŋene ŋara soep nekeneo, ea wane ramore eŋetze mi ma wayake.

⁹ Ŋine kaulukkei, ŋei wele natne ŋine mali malip ŋine seleleineŋo dere ewekeu paki ne okan-

mami, njine maine gekei, ɲo kimakopɲine miti mali malip ewekine pa ebon okanmaike, eɲe wet masiuk okanonbi borikino ket qekeiwane dere mezet okanikei. ¹⁰ Ge ɲei bile sorin borinɲone weneɲɲo ari lopio wane urumgo ɲara soep sotno more mere nekene, pakimo kimaɲone mane eɲe miti mali malipine ewekine, eɲe gangi qomine saki nemaikane newe ra, mi yewaka mere lopio wane ɲara soep neake me? ¹¹ Eso geɲane sorin borin ɲoneɲo ɲei kimaɲone miti mali malipine ewekine pa manmaike, Kristoɲo eɲane ramore seukke, eɲe matali kamaike. ¹² Njine masi borikine kimakopɲine yale okanone more wet mali malipene pelemekatne, qe masiuk okanonikei, yemo Kristo masi borikine okankaikei. ¹³ Ea wane mo ɲara soepɲo maki kimane borikino ket qemaikane, na koso lopio wane ɲara soep mi nekale, eso na yale okane more kimane koso mi matalikawe, borikino ket qeake.

9

Paulo eɲe aposolo urata wane lewine mi makane wetpese detke

¹ Na mulap korop gemaile me? Na aposolo mida me? Na Yesu, ɲenze Waom mi kakole me? Na Waom wane urata makolane weleine njine mi wakone gemami me? ² Na natne eɲane aposolo mi mane ge okanmaile, eso njinane aposolo yemo welekatne ge okanmaile. Aposolo uratanane weleine Waom wane mosopko wako wakone yemo njine.

³ Nei natne nanane nade don ra okanmami, eje don nat paromine iwa yale mainge edan okanmaile. ⁴ Natne nene ninano nine miti urata wane nara me doku mi nekenane rawet nongoi ⁵ Aposolo natne so Waom wane nlekoune so Petoro eje nanowekopene enerop wenej miti qelit ari okanmami. Pakimo natne nene yemo nrep midaine ge more miti urata makenane ra nebongoi me? ⁶ Me na so Barnabas, netoka metesenjo urata mate paki kine kine marat kaiketane ra nepongoi me? ⁷ Ma nei no kawali wane urata maki paki koso onomka naraine marat kayake? Mida! Manjo wain ebotki wele wakongi mi neake? Me manjo lama wareone geki paki, koso namuene mi neake?

⁸ Na don iwa nei dereret mogare nae wetkonjine ra wakonmaile me? Rara Togon numa yewano don weku yewaka mi ramaike me? ⁹ Mose wane Rara Togon Numa yewao iwa yale qeke, “Bulamakaujo wit woune ra muzuge neki ge anjaine misuk mawon gekene, eje urata wane nara maine nemaike.” Pakimo Anutujo don iwa ea bulamakau enaneka wetke rake me? ¹⁰ Me eje nenane wenej dere more rake? O, don iwa yemo korop nenaneka ra more qeke. Ea wane euo sere gemaike, nei yewa eje wele wakongi neakane wetke more gemaike, eso nara wele menangi mamaike nei yewa eje neakane wetke more mamaike. ¹¹ Nene miti urata ninano ma more waet keunjino dukkone, ea wane turunjine nine solawane qesi qesinj kine kine nebonbi rap onokawane, ninano waet dukkone ea wane weleine. Eano maine mi okangirap me? ¹² Natne

eŋe ŋinano ŋine ŋara aboŋ mau, urata ŋei sogine ŋene aposolo weneŋ mamaine mi pamaike me?

Paulo Eŋe Miti Urata Lewine Midaine Make, Yewaŋo Wetpese Donine Okange

Ŋo ŋene yemo Kristo wane Miti Don Maine yewa numa leŋkaikenane raŋem paki ŋinano ŋine ŋara aboŋ maikenane raraine yewa waluke more siluŋ yaup wikile kutno ge okan maine. ¹³ Bakom Urungo urata ma okanmami, eŋe Bakom Urungo ŋine ŋara ne okanmami, eso aratao soe soep mit mit urata ma okanmami eŋe aratao ŋine kine kine ne ma okanmami. Yewa ŋine mi det okanmami me? ¹⁴ Rokop yalewaka miti urata mama ŋei eŋe miti urataiŋeŋo sola wane qesiŋ yeye kine kine ma wakone eboniakane Waomŋo rake.

¹⁵ Ŋo siluŋ na kine kine yaline mane mi ma okanmaile. Me ŋido ea wane rokopko iwa yaleka ninikei wane wetke more kibi iwa mi qe ŋibonmaile, midakaka. Na sola wane qesiŋ zuage more seukewe ra, ea maine seukkale, ea wane rokopko maneŋo sola wane kine kine okannan okannan yemo midakaka! Na ea wane wetpesek gemaile, ea maneŋo wet peseke ea mi maki kesiake. ¹⁶ Na miti ra okanmaile yewa wane daleo batne okanbe menageake, na yewa makalane ra ninnin ninane ma okanmaile. Ŋo na miti rara urata yewa yeine qeligewerap, yai, yewamo Waomŋo daleo okan nangirap? ¹⁷ Na urata, nae wetno wakone more mawerap, yemo gemage lewine mawerap. Na yemo urata iwa wane mi rawe Waom oŋom miti wane ŋetne

gekalane ra ningane miti urata lewine midaine ma okan okanmaile. ¹⁸ Ea wane mo na lewine onoka maikale? Yemo iwa yale: Na miti urata ma ariwe paki nei miti lewine midaine edan okanmaile, pakiso miti wane ra more sola oken wane kine kine makalane raraine yewa waluk okanmaile. Ea wane mo miti lewine midaine edan okanmaile, yewano mo uratanane lewine okanmaike.

Paulo Eje Nei Kine Kine Epane Qelit Mama Okange

¹⁹ Na maine ramaile, na nei keuo njine, nei mane wane qelit mama midaka. No siluŋ na nonomka rawe paki nei korop epone qelit ma gemaile, yemo onoka wane, nei loutnejo miti dere more menangei wane wetkewe paki yale okan okanmaile. ²⁰ Yuda nei epone gewe paki Yuda nei mane wane tanik okan okanmaile, onoka wane Yuda neino menangei wane yale okan okanmaile. Miti sogine Mose wane Numa ma qe okanmami, enerop gewe paki miti sogine Mose wane Numa ma ge okanmami, epone tanik ge okanmaile, eamo miti sogine Mose wane Numa yewa wane qelit gewe paki midaka, miti sogine mage okanmami, no menangei wane yale okan okanmaile. ²¹ Qelan miti midaine Mose wane Numa ndino ge okanmami, epone gewe paki qelan Numa ndino ge okanmami, epone tanik ge okanmaile, ea mo qelan miti midaine edo menangei wane, yale okan okanmaile. Na miti midaine epone keuo Anutu wane Numa ea maine mi qelige gekale midaka, epone numa solaino arikale, ea na welekatne mitiwo Kristo wane Numa kotino

ge okanmaile. ²² Miti ɲei zonomene pelekakatne eɲane keueno ge more pelekakatne tanik okan okanmaile, eamo pelekakatneɲo menangei wane yale okan okanmaile. ɲei kine kine edo menangei wane eɲane keueno ge more tanik kine kine okan okanmaile. ²³ Eso na yeye kine kine korop okan okanmaile yemo Yesu wane mitiɲo wakone ari-akane, pakimo na noɲom miti mali malip wane morian wane damoze ɲei natne eɲerop wenenɲ maikale.

Togogleka Biririk Mage Lewine Maikene

²⁴ Bat sobeɲino ɲei loutneɲo biririkkei. ɲo siluɲ eɲano ɲine ɲei wekuɲo alakane sobeɲ qoi qoino lotke more lewine mayake. ɲine yewa mi detmami? Ea wane mo ɲine yaleka biririkeu paki yuane more lewine maikei. ²⁵ Biririk biririk wane ɲeine eɲe oɲaine biririkei wane rau paki sawe kine kine ge more tau ge okanmami. Eɲe kine kine sinoine gegeine, midaine gegeine bango, ea wane yale okan okanmami. ɲo ɲedo yemo kine kine wele, ma gege togon, ea wane yalewa okanikene. ²⁶ Na noɲom biririk okanmaile, eso dene yau yaup pore midakaka, kudupka modare biririk okanmaile. Na kawali qekalane metene birawe yaup tewino mi ari okanmaike. ²⁷ Midaka! Na solane zok qewe paki qebinkawe nae similene ea mogare ari okan maike. Na ɲei miti ra edane gemage nae uratanane weleine mi wakoniakane, ra more solane wareka okanmaile.

10

Asuɲo Israel ɲei Kepe Keuo Masi Ma Ebongi

Qekoi

¹ Kimakopne na ɲabokopze Mose wane naso kine kine okangoi ea wane kine ɲaɲaekɛi wane wetke ɲibonbe detpi. Eɲe korop kezonɲo kawetongi ariu paki koropka Kiwet Takitne zip ziuno gesoke maineka ari wawarekoi. ² Eso Mose wane ɲeikoune okanikei wane rau paki eɲe korop kezon so kiwet ɲo miti dokuene leleki taukoi. ³ So eɲe korop Waom wane Asuɲo ɲara mawakone ebonge weku yewaka ne arikoi. ⁴ So korop eɲe Asuɲo doku mawakone ebongi, eɲe yewaka weku ne arikoi. Eɲe Asu wane wesi eɲerop weneɲ arikoi, wesi yewa ɲine doku ketki nekoi. Eso wesi yewa yemo Kristo okanmaike. ⁵ Eɲe kine kine yewa korop okanon wareke, ɲo siluɲ Anutu eɲe tanik manikene borikine ea wane mi similekaki eɲane keuo ɲine ɲei ɲerep wele korop dere worik one qeliɲongi kepe sai togolo seuke qe qolok okan warekoi.

Israel ɲei Eɲane Masi Wakonge Ea Giremze Okanmaike

⁶ Ukude, tanik manik korop eɲano wakonge, yewaɲo ɲenane giremze okangi ɲedanmaikane ɲene kaɲem paki eɲe okangoi yale wetzeɲo borikine kine kine misuk ma qot okanikene. ⁷ Me eɲano ɲine natne okangoi, yale okane lopio misuk meɲen kaikene. Ea mo Anutu wane Papiao iwa yale qeqine pamaike: “ɲei ɲerep pese ket mere ɲara nekoi so doku nekoi, so koso wie more eɲet ore more so wenip yau yaup mau paki doku neu eaɲo wet siuk okanonge.” ⁸ Nene wenip yau yaup eɲano ɲine natneɲo makoi, yale misuk maikene. Eɲano ɲine natne eɲe yale okane

more kaiwe weku yewaoka ñei ñerep 23 tausen (23, 000) seuke pawarekoi. ⁹ Ñine eñano ñine natneño Waom liwekkakoi yale misuk okanikei. Eñano ñine natne eñe yale okangoi, ea wane koma edo edotki seukkoi. ¹⁰ Me ñine eñano ñine natneño Anutu sorinkakoi, ño ñine yalewaka Waom misuk sorinkaikei. Eñano ñine natne eñe yale okankakoi, ea wane Seu Seu wane Añeloño Ezipt kepeo enguki seukoi.

¹¹ Yeye kine kine korop iwa ñabokopze eñano wakonge, ea yemo natne eñane qaka okanmaike, ea weneñ desikei, wane naso goeyakane Nasoine bomileki, gemaine ñenane girem don ra more don kisi iwa Papiiao qeqine.

¹² Ea wane, ñei mane eñe eñinane detki togogle okan okanmaike, eñe peleke ket qeakane kauluke geake. ¹³ Ñinano liwe liwek natne wakonge, ea mo ñinñine zonom so dereret ñinane kouno wakonge, ñei natne eñano liwe liwek wakon okanmaike, yewaka ñinano wakone sake. Ea wane ñene Anutu maine detluk kaikene, pakimo eñe liwe liwek yewa ma ewekki zonom ñinane rokop yewa yuane more mi liwek ñuniake. Midakaka! Liwe liwek ñinano wakoniakeo, bañ Anutuño numaine ma ñibone more qesiñ ñungi ñine maine togolekei.

Waom Wane Ñara Ne More Satan Wane Weneñ Nene Eamo Mi Pamaike

¹⁴ Ea wane kima maepkopne, ñine lopio isisine eñane tanik manik yewa ñadekkau paki yeine qelige gekei. ¹⁵ Ñine wetñinerop, miti dereret gemami wane don iwa ñidanbe detlukeu.

¹⁶ Laseo wain mosopkake, ea wane ñene Anutu

menjenkanjem mosopkaki nejem paki, Kristo wane wenjem gorop tako rakot okan okanmaine. So nene bret mapok okanmaine, naso yewao ne more, Kristo wane sola bikum gorop tako rakot okan okanmaine ¹⁷ Bret wekuku nei nerep magu suainero bret weku ne more qeturanj ngonji kima magu weku okane ge okanmaine.

¹⁸ Njine Israel nei enane kineene detlukkeu, ene njara soep ne okangoi, ea mo Waom wane zakeo mire more ne okangoi, eno qeturanjoni ene zake ea wane Waom gorop magu weku okangoi.

¹⁹ Njine nanane don iwa yale ramaike, ea misuk desikei, “Qelan edo waom isisine lopio wane soe soep mitmami, eamo maine welekatne.” So na iwa yale wenej mi ramaile, “Waom isisine lopio eamo kine kine eamo wele.” ²⁰ Midaka! Na iwa yale ramaile, qelan nei ene njara soep mit okanmami, eamo asu gotkoinane ene Anutu wane mi mit okanmami, njine yemo osoja, asu borikine enerop tako rakot mi okangei wane nanmaike. ²¹ Njine Waom wane laseo njine doku ne more koso asu botkoinane laseojine maine mi nekei, njine Waom wane zakeojine njara neu paki koso osoja borikinane zakeojine njara maine mi nekei. ²² Me njene Waom koto matali okan kanjem maine mi det worik okan joniate me? Nenane zonomjo Waom wane zonom yuankamaike me?

Mane Eje Enjaneka Dereret Detki Mi Menageake

²³ Nei natne iwa yale ra okanmami, “Yeye kine kine korop oka okane pamaike, ea welekatne.” No na ramaile, silun yeye kine kine korop okane,

miti wane qesi qesiŋ okane doku tau tau magu wele gege yemo mi pamaike. ²⁴ Mane eŋe eŋine menageakane ka mi desiake, ŋei natne eŋe menaŋei wane weneŋ desiake.

²⁵ Njine soep qole qole wane naluo njine soep kine kine yaup qazan qelaŋ eŋano njine qole-mami, yewa njine maine nekei, dere qeka okane misuk qesongeŋi. ²⁶ Onoka wane, Anutu wane Papiao iwa yale qeŋeŋe, “Kepe, so kepe wane kutno yeye kine kine pa waremaike, ea mo korop Waom waneka.”

²⁷ Qelaŋ ŋei maneŋo eŋane matko ari mere njara nekei wane newan njuniakeo, njine ari more njara kine kine sotnjino mosiake, yewa maine nekei. Dere qeka okane ra qesonka mi okankaŋkei. ²⁸ No ŋei maneŋo njidane rayake, “Njara soeppae mo mire lopio wane sotno morimi yewa njine.” Rakiso, yemo ŋeiwa njidanike, oŋo dere worik njuniakane, eŋane ra more dere mezet okane so yeine walukkei. ²⁹ Neu njinane koto njine boriakane mida njidanike, ŋei yewa wane kotine boriakane dere mezet okane yeine walukkei.

Na nae kotoneŋo dere mezetine midaine pakimo, onoka wane ŋei maneŋo eŋine kotinane rokop yewaŋo naŋano makatakeake? Ea maine mida! ³⁰ Na Anutu dage kito olatpe paki njara soep meŋe meŋeŋo mosopka newe maŋo onoka wane dere worik naniake? Ea mida!

Sot Midaine Gekene

³¹ Ea wane njine njara soep me doku surok nekei, me yeye kine kine mane okanikei wane rau paki Anutu ewine kito mawakaŋkei. ³² Njine Yuda

nei, so Grik nei, so Anutu wane doku tau tau magu enane kaiteno sot midaine geu, eje mane mi detpi bori niboniake. ³³ Na yaleka nei kine kine eje nanbi menageakane gemaile, paki na nae kine kinejo menageakane mida, nei loutnejo miti dere more menangei wane urataine ma okanmaile.

11

¹ Nonjo Kristo wane numao gesoke mogare ari okan maile, eso njine yaleka nanane numa yewaka gesoke mogat nanikei.

Nei So Njerep Kineze

² Njine naso banem nanane wetke more don kine kine korop maine paki, ra njidangole, yewa wane rokopko mogare malilipke ma ge okanmami, ea wane njine mawa njunmaile. ³ Eso koso mane rawe desikei, yemo iwa yale, Kristo eje nei korop enane lewet suaine, nejino njanominane suaine, eso Anutujo yemo Kristo wane suaine. ⁴ Eso nei mane lewine kawetkeki paki menenkayake, me miti rayake eje suaineine Yesu Kristo ewe mabaik okankayake. ⁵ So njerep mane lewine kaweune midaine ge more menenkayake, me Anutu wane miti rayake, eje yaleka suaineine Yesu Kristo ewe mabaik okankayake. Eamo njerep yaup gegeene lewetene zoune unbi nobetka okaniake, enjerop rokop weku okaniake. ⁶ Eso njerep eje lewine kaweune midaine geakane raso yemo lewine zoune ungi nobetka okaniake. No njerep eje lewine zoune ungi nobetka mesiakane gamu gamu okaneso, yemo lewetine

maine kawetkeake. ⁷ Nei eje yemo lewine kaweune midaine geake, onoka wane, eje Anutu wane bango eñine kait tanik so zonom so kibi sotaine mamaine, ño ñerep yemo ñei wane bango so eñane kibi so zonom sotainenjo mamaine. ⁸ Iwa yale wane Anutu eñe ñerep wane sola bikuminejo ñei mi make. Midaka. Eñe ñei wane sola bikuminejo ñerep make. ⁹ Me Anutu eñe yaleka ñerep wane detki paki ñei mi ma wakonkake. Midaka. Eñe ñei wane detki paki ñerep ma wakonkake. ¹⁰ Ñerep eñe ñei wane bango gemaike, ea wane kibiine yemo eñe lewine kaweune wenen geake, pakimo anelo eñe kau menageake. ¹¹ Eso ñene gegeze Waom wano pamaikane, ñei eñineka bonep gege me ñerep eñineka bonep gege ea mo, mitiwo yale mi pamaike. ¹² Ñerep eñe ñeiwanonjine, set bikuminejo make, rokop yalewaka ñei ñene ñerep wane kotino ñine wakone sua leule okan okanmaine. Eso yeye kine kine korop yemo Anutu wano ñine wakone sari okanmaike, onjo welaine.

¹³ Ñine ñidom dere kau, ñerep mane eñe lewine kaweune midaine Anutu menenkayake ea masi maine me? Mida! ¹⁴ Nei ñerep ñenze tanik manikzenjo sikan ñunmaike, yemo iwa yale, ñei mane eñe lewine zoune kiroroine ma geake, yemo mi menageake. ¹⁵ Ño ñerepjo lewine zoune kiroroine ma geake, yemo menageake, onoka wane Anutunjo lewine zoune kiroroine mange, eanjo lewine setne kawetkeakane, eanjo lewe kawetinane kibi okanmaike. ¹⁶ Ño mane eñe nanane don iwa wane don urata mayake,

me rayakane okaniakeo, yemo iwa yale desiake. Masi iwa njene masi mane mogatjem, Anutu wane doku tautau magu mat natne enje mane mi mage okanmaine.

Korinti Eje Waom Wane Njara Matalikoi

¹⁷ Na iwa girem don natne njidanmaile, na mi mawa njunmaile, yemo iwa yale wane, njine lewa lewan njino lewage masi maine mi okan okanmami, midaka! Masi gotkoine okan okanmami.

¹⁸ Na lewine ea wane rawe, njine doku tau tau magujo lewanmami, naso yewao keu njino mapo mapokine wakon okanmaike, yale nolatpi na don ea wane detpe, welekatne gou okanmaike.

¹⁹ Welekatne, doku tautau magu keu njino mapok, yemo yaup mida miti mage mage njinane kine didiwo wakoniakane, so nej njerep manjo Waom wane uratao modat lukmaike, ea maine wakongi kaulukkei. ²⁰ Njine ruo njara wane geturage okanmami, naso yewao Waom wane njara wele nekeiwane maine mi lewan okanmami. ²¹ Mida njine bonep bonep njinnjine njara ikopka ne okanmami, eso mane enje njara wane seukeake, so mane enje doku zok neki wetine siukeake. ²² Me daleo? Njine njinnjine mat bonepnjine mi pamaike me? Yewao njara so doku newe ra neurap me? Me njine Anutu wane doku tau tau magu enjane detpi kine kine yauwine okanmaike, pakimo njine nej njerep natne njara midaine gamu kuteno motkei wane sari okanmami me? Njinane na daleo raikale? Na maine njinane masi ea wane bakom kito mawa njunikalane me? Ea, midakaka! Na kine kine ea wane maine mi mawa njunikale.

Pauloŋo Ruo Njara Wane Kine Ra Qelanange

²³ Na Waom wano njine don makole, ea yaleka njine kito njidangole, ea wane done iwa yale pamaike, Yudaŋo Waom Yesu siron qeki makoi, ruo yewao Waom Yesuŋo bret make. ²⁴ Paki Anutu bakomine kito ea mapoke more rake, “Iwa nanane bikumne, njine qesiŋ njuniakane njibonikale. Nanane dereret ge more yale nekei.” ²⁵ Bret neu, eje wain lase okange, yaleka ma more rake, “Lase iwao wejemne metmaike, eaŋo Anutu wane siwa siwap me tako rakot muselane qesiŋ, na noŋom wejemneŋo ma wakone motmaile, ea nekei rokop nanane dereret ge more ne arikei.”

Mane Eje Waom Wane Njara Mataliake Eje Sotkorop Okaniake

²⁶ Yesu wane don eaŋo iwa yale sikanŋonmaike, njine naso banem bret iwa nekei, so lase iwa njine wain nekei, rokop Waom Yesuŋo wikile make so detke, so seu seuinane don kisi weneŋ ra qelanane ge mageu Waom ejine sari lotkeake. ²⁷ Ea wane mane eje Waom wane njara me laseo njine wain mi detluke mabaike more qazaŋ neake, eje Waom wane bikum so Waom wane wejemine ea ne siuke sotkorop okaniake. ²⁸ Eso yalinane mo, mane eje ejine wetinane kine detkaki paki, njado bret ne more laseo njine wain neake, ²⁹ onoka wane, nei eje Waom wane bikuminane kine mi detluke malipka more bikumine ne more laseo njine wain yaup neki paki ejine sotine ne wakonmaike. Pakimo Waom mo manerop okankayake. ³⁰ Njine yalewa okan okanmami, ea

wane njinano njine jei n̄erep loutnejo zomarop so zonomene midadaine zok ge okanmami, paki loutnejo mo esat seukwarekoi. ³¹ N̄o njene n̄edomka kotozane kine mo ma wesake ma qe-lanjanikeneo, yemo Anutujo njongi sotze midaine okaniake. ³² N̄o njene qewolonj okanj̄em, yemo Waom̄jo kineze ma wakone more ma koboe njoniake, pakimo njene enjine dokoine okangene. Ene yale okannjoniake, yemo njene kepeo miti midaine borikine mama jei n̄erep natne gemami enj̄erop qelinj̄ongi, mi midakene.

³³ Eso kimakopne, ea wane njine Waom wane ruo njara qeturage weku nekeiwane lewage toma metpi, natne sari wareu kieke nekei. ³⁴ Eso mane enj̄e njara wane seukmaikeo, enj̄e matino njara neake, pakimo wekuoka lewa lewanj̄ine, yewao Anutujo kinej̄ine mi ma wakoniake. So don kine kine natne pamaike, eamo banj̄ nonjom umore ra njidanikale.

12

Asujo Urata Kine Kine Damo Mamaike

¹ Kimakop, iwa yemo Asujo njinane kine kine damo qemaik̄e, ea wane kine nj̄an̄aek̄e wane njidanbe detpi. ² Njine mo detmami, mokaka njine qelanj̄ gekoi, naso yewao lopio donene mi raraine me gegeene midaine, edo tebanj̄unbi enj̄ano ari gekoi. ³ Ea wane, njine iwa yale desikei. Mane enj̄e Anutu wane Asujo enj̄erop geki paki don olatki, enj̄e Yesu wane enj̄etine maine mi ra matali more soak kutino mosiake. So mane enj̄e Asu

Koboboine midaine geakenjo maine mi rayake, “Yesu eņe Waom.”

⁴ Miti urata wane kine, mane mane pamaike, ņo Asu yemo weku gemaike, oņo damo qe ņebon okanmaike. ⁵ Miti wane urata kine kine maikenane numaine loutne pamaike, ņo urata welaine yemo Waom weku gemaike. ⁶ Miti wane urata maikenane, masi kine kineine loutne pamaike, ņo masi welaine yemo Anutu weku gemaike. Oņo zonom ma wakone ņebon okanmaike. ⁷ Asu eņe mitiwo geuluke more korop qesiņ onikenane, ņei welaine welaine zonomine mapoke ņebon okanmaike. ⁸ Asuņo ņei mane dereret mangi miti kine qeirop detluke more rayake, so mane eņe Asu yewaņoka zonom mangi miti kine maket more rayake. ⁹ Mane eņe Asuņoka qesiņkaki mali malip korop geake, mane eņe Asu yewaņoka zonom mangi zomarop ebuki menaņgei. ¹⁰ Asuņo ņei mane masi kine kine togole mayakane zonom ma wakone maniake, so mane eņe Anutu wane don ra qelaņaniakane wetine malotkeake, so mane eņe Asu maine so asu borikine ea wane kine detkayakane zonom maniake. Mane eņe don kine kine kuneņine kait qotot mi dereretne rayakane wetine ma qelaņaniake, mane eņe don kine kine kuneņine kait qotot mi dereretne dere main geakane zonom qesiņ kayake. ¹¹ Kine kine iwa korop yemo Asu weku, oņomka ma okan waremaike. Eņe eņine wetinane detluke more ņei welaine welaine damoene qe more kine kine mapoke ebon okanmaike.

Solaze Weku Qelit Dokoine Loutne

¹² N̄ei n̄ene solazeno weku, n̄o solazane qelit qeqe yemo welaine welaine qelit qekamami, pakimo sola wane urata mamakoune loutnejo qeturage weku okanmaike, Kristo wane magu eñe sola weku yale, sisine koune loutne, eñe siluñ loutne, n̄o qeturageu sola weku okanmaike.

¹³ Numa weku yewaka, n̄ene korop Asu weku yewan̄oka miti doku tau taun̄o qeturañ n̄ongi, sola weku okangone, Yuda me Grik, qelit n̄ei me yaup similane gegine, n̄ene korop Asu weku n̄ebongi ma more, eaño qedugun̄ongi weku okangone.

¹⁴ Pakimo sola eñe weku mida, eñe sisinekoune loutne. ¹⁵ Kien̄o iwa yale rayake, “Na mete midakaka, ea wane na sola wane sisine mida,” yale ra more daleo sola qeliñka eñineka geake, rayakeo, eaño kitatka maki eñe sola mi qeliñ kayake. ¹⁶ So ket eñe iwa yale rayake, “Na de midakaka, ea wane na sola wane sisine midaka.” Yale rayakeo, eñe daleo sola qeliñka more eñineka bonep geake, eaño kitatka maki eñe sola mi qeliñ kayake. ¹⁷ Eso sola eñe korop deka okaniakeo, eñe daleo don detkirap? So eñe ketka korop okaniakeo, eñe daleo qoune detki rap? ¹⁸ Sola eñe yale midakaka. Anutuño sola wane sisine natne eñe korop urataene bonep bonep detluke more qelit mama urata maikewane ra biraon wareke. ¹⁹ Sola wane sisine nat korop eñe ki-neene wekuka okangera, yemo sola mane mi pakirap. Midakaka! ²⁰ Iwa mo yale mida, sola eñe sisine nat koune qelit qeqe loutne pamaike, n̄o solano yemo weku.

²¹ Eso ea wane den̄o mete maine mi olale

rayake, “Ge midaine na maine gekale.” Me lewetño kie maine mi etane rayake, “Ñire midaine na maine naeka gekale!” ²² Ea midakaka, ñene solazane sisine natne koune eñane kañem zonomene midaine okanmaike, eñe midaine solarjoka zonominerop maine mi geake. ²³ So solazane sisinekoune eñane detñem ketkele okan okanmaike, ea takot laplapño kibi manerop mauluke ebu okanmaine, so solaze sisine natne maine mida gamuinerop, yewa ñene mauluke kaweton okanmaine. ²⁴ No solaze sisine natne korop mayakatne, eamo yaup tingo qeliñonñem urataene ma okanmami. Anutu oñom solaze sisine ea korop weku yale mawareke. Solaze sisine natne ketkele, eñe urata manerop wawaine ra ebonge. ²⁵ Solazeño mi wiri more sisine nat nat okane, eñe korop wekuoka qeturage qelit qeqe maine okangei wane eñe yale okange. ²⁶ Ea wane sola wane sisine mane eñe wikile desiakeo, sola sisine natne eñe koropño wikile desikei, me sisine nat mane eñe eñetine mawakayakeo, sisine nat nat korop eñe bakom kito warekei.

Miti Wane Urata Mama Ñei Kine Kine Gemaine

²⁷ Iwa yemo ñine korop Kristo wane sola okanmami, eso weku weku yemo solainane sisine nat nat korop okanmami. ²⁸ Doku tau tau magu eñano Anutuño ñei iwa yale biraonge. Lewine aposolo, ñado propet, yewaño kito ebo ebon, ea wane ñadino masi mama wane ñei zonomgorop, so zomarop ebuwi menañgei wane ñei zonomgorop, so ñei setene pelekakatne, zoma kubet korop qesiñonge wane ñei, so ware ware urata

kine kine warekei wane ɲei, so don kunenɲine rara ea wane ɲei, yale biraonge. ²⁹ Eɲe korop aposoloka gemami me? Eɲe korop propetka gemami me? Eɲe korop kito ebo ebon ka gemami me? Eɲe korop masi togole mama wane zonomgorop gemami me? ³⁰ Eɲe koropɲo zomarop ebuwi menaɲgei wane zonom gorop gemami me? Eɲe koropɲo don kine kine kunenɲine maine raikɛi? Eɲe koropɲo don kunenɲine raraine maine maingekɛi me? Eɲo midakaka! ³¹ No ɲine siluɲ miti wane damo maniɲa wele suaine maikɛi wane yemo togole more sorin borin okanikɛi.

Pakimo, nonjo ea wane numa mayakakatne iwa baɲ sikanɲunbe gesokkɛi.

13

Wet Maep Midaine Kine Kine Okanɲem Yauwine Leleake

¹ Na kepe ɲei ɲɲerep eɲane don so aɲelo eɲane don maine rawerap, paki na wet maep midaine gekaleo, yemo naɲane donneɲo wagom mane kitou arokmaikɛ, ukatne, me romon mane wane aroine yale don sawaɲ okangirap. ² Na propet ge more don sane korop detluke more kine kine ɲado wakoniakane done rawerap, paki na Anutu wane don sane ea wane kine maine det warewerap, so miti wane kine pokaine, me tutuine, ea maine dere detluke detperap, so na rawe bonaɲaɲo okora okoraine qelige masikaniakane mali malip maine pa ningirap, paki wet maep midaine gekaleo yemo na ɲei sinoine lelewerap. ³ Na maine kine kinene korop ɲei abonene midaine matoke ebon warewerap, so nae solane Kristo

wane ra more sunkawe gerepko zekirap, ŋo na wet maepne midaineŋo yale okangaleo, na wele mi marat kaikale.

Wetmaep Koropŋo Miti Numao Maine Gesokeake

⁴ Wet maep koropŋo eŋe ŋei peamine, so pesekine geake, ŋei wet maep koropŋo ŋei mane wane okora okora me met met me urata mama me don rara me aboŋ kine kineinane bailalaŋ mi okaniake. Ŋei mane wet maep koropŋo eŋine solaine mi mawalak kayake, eŋinane detki wawaine mi okaniake, ea midakaka, eŋe ŋei korop kima okanoniake. ⁵ Ŋei wet maep koropŋo kine kine qazazaŋka mi okaniake, so bonep mi okaniake. Eŋe sot osi osi ikopka mi okaniake. Wet maep koropŋo masi qotkoine okankau turuŋine mi dapore mageake. ⁶ Ŋei wet maep korop eŋe borikineŋo sua ariki qom borik desiake, okan mama bilenjo sua ariki wetpese desiake. ⁷ Wet maep koropŋo umat kine kine korop tewekwareake, yeye kine kine korop detluke dere worik mane mi desiake, wetineŋo korop lukka tebaka geake, umat kine kine wakongi togogleka ma okorayake.

Wet Maepŋo Qoiqoine Midaine

⁸ Wet maep yemo qoiqoine midaine, papa togon. Anutu wane don rara wane urata yemo baŋ mida lele ariake, don kuneŋine kait qotot rara wane bakom pamaike, ea baŋ midayake, dereret mama wane urata yewa baŋ mida lele ariake. ⁹ Iwa yale, ŋenane kine dereretze eamo weti kutka, so ŋene Anutu wane don ra okanmaine, ea

yaleka weti kutka. ¹⁰ No gemage kine kine wele papa togon ea wakongi kine kine kutka oka okane eajo ban siuke mida leleake.

¹¹ Na ea wane kine ra qelanganmaile, na medep nigatne gekole yewao medep don ra gekole. Na medep wet wetke gekole, so na medep dereret dere gekole. Eajo ge mage nei suaine okanbe paki medep tanik manik ea korop qelin warekole.

¹² Nene naso iwao Waomzane kine maine mi kaulukkene, ge mage Naso Suaino mejo me qan aito kaitzeno aekkene, na ukude iwa kine kine weti kutka detka okanmaile, ge mage njado kinerop ka detka okanbe qoeyake. Anutujo na yaleka kinerop nanluk okanmaike.

¹³ Kine kine karewe iwa edo papa togon paikiei: Mali malip, ora tebaka tebaka, so wet maep. No iwa enano njine wet maepjo yemo suaine okanmaike.

14

Asu Wano Njine Bakom Ea Wane Don

¹ Njine wet maep marat kaikei wane sorin borin okane togolekei. So gom njine ewekki Asujo kine kine korop damo qe njibonmaike, ea wane sorin gekei, eamo miti kine rara wane damo manija binjek njine ma more, ewekeu paki Anutu wane don togoleka ra qelanganjei. ² Mane enje miti don wet njorobun kunenine maneo rayake, enje ra more nei mi edanmaike, midaka. Enje Anutu olatmaike, onoka wane nei maneno don iwa mi detmaike. Enje Asu wane zonomjo qebinkaki don sane wele ra wakonmaike. ³ No mane enje Anutu

wane miti don rayake eɲe ra more ɲei naɲ qeoni-ake, so ma togole one more wet pese okanoniake.

⁴ ɲei miti don kunenɲine maneo rayake eɲe eɲine wetineka weku ma togolekayake, ɲo mane eɲe Anutu wane miti don kine rayake eɲe doku tau tau magu qesiɲone ma togole oniake.

⁵ Na ɲine koropɲo don kunenɲino kait qotot raikei wane simin nanmaike, ɲo ɲine koropɲo Anutu wane miti don kine raikei yemo zok manerop simin nan lukmaike. ɲei mane miti Anutu wane don rayake eaɲo manerop suaine okanmaike, paki don mane eɲe don ɲorobuɲ kunenɲine kait qotot maneo don rayake eɲe yuan kamaike. So don kunenɲine kait qotot maneo don rayake, eɲe ra more ɲado kine maine mainge ɲei ɲerep magu edangi eɲe dere more ea wane wele mageu menageake. ⁶ Eso kimakopne, ea wane iwa ɲinano umore don kunenɲine kait qotot natne yewao miti ɲidanikaleo, daleo ɲine qesiɲ ɲunbe koto ɲino kesiake? Mida. Na Anutuɲo don sane natne sikan nange yewa ɲidanikaleo me, miti wane dereret qeirop, me miti wane kine natne ɲidane more ɲibon okanbe, yemo maine koto ɲinane wele okaniake. Na don kunenɲine kait qotot mi raikale, na don tingoine, didiwo eao maine rawe desikei!

⁷ Eso gegeene midaine kine kine tewine, mulup so gitakaki puane qeu aroine tingo arokki eɲet wetne didiwo desikene. Aroine kine kine arokki daleo detnom lotkeake? ⁸ So ɲei mane oɲo biugal puangi aroine suaineka didiwo mi arokeakeo, maɲo baɲ dere more kawali qeakane aboɲ maulukeake? ⁹ ɲine yaleka. ɲine don kunenɲine

kait qetot mane hei n̄rep mi detmami yewaoka miti kawēunerop raikiwo, hei n̄rep eje n̄ine onoka wane ramami, ea kine daleo desikei? N̄inane don n̄inejo yaup ari mida leleake. ¹⁰ Don kine kine loutne kepe banem yewao pa ari-maika. Manējo kine midaine mi pamaika, kop kineropka pa waremaika. ¹¹ N̄o na hei manējo don mane raki, don wane kine mi dere qelanane n̄an̄aemaileo, yemo na hei yewa wane detpe eje nan̄ane kimane mida, eje ban̄ hei tego mane okaniake, so eje yaleka nan̄ane detki na en̄ane kimaine mida, na hei tego mane okanikale. ¹² N̄inano kine yewaka pamaika, n̄ine Asu wane zonom maikai wane zok ra okanmami, ea maine, so kine kine natnane mida, mitiño doku tau tau magu keu n̄ino wakonluka payakane, n̄ine urataine togogole soringe mau ea wane bakom damo morianine n̄inano wele wakone, doku tau tau magu qesin̄kaki, sua wayake.

¹³ N̄ei don kunen̄ine kait qotot maneo miti kine rayake, eje Anutu mejenkaki on̄o qesin̄kaki miti kine detluka more hei n̄rep mainge edaniake. ¹⁴ Na don kunen̄ine kait qotot maneo mejen̄ kaikaleo, yemo wet n̄orobun̄ n̄oku mejen̄ kaikale, n̄o wetnējo kine dere mi okanikale. ¹⁵ Ea wane na daleo okanbe rap? Na ban̄ n̄orobun̄n̄o mejenkaki wetnējo wenen̄ yaleka detluka, an̄anejo ban̄ ra qelan̄anikale. So na ban̄ Asunen̄o en̄et kitoki, wetnējo yaleka detluka an̄anejo kitokale. ¹⁶ Ge Anutu mejenkanom paki, Asun̄one n̄oku ora ma wakanom, hei mane eje gen̄ane don n̄an̄aeyake, paki hei yewa eje daleo mainge Anutu mejenka, asun̄onejo ora mejen̄

kamaine, ea wane qesingane rayake, “I, weleka!” Onoka wane ge don ramaine so Anutu ora mawa kamaine ea wane numaine eje mi detmaike. ¹⁷ Welekatne, geḡane meḡe meḡen ḡoneḡo Anutu mawakam paki, olatkene ea maine. Ḣo siluḡ ḡei mane yewa eḡe mi qesiḡ kaluke ma togolekaki wele marat kamaike.

¹⁸ Na miti don kine kine kuneḡino kait qotot rawe paki, natne ḡine korop yuan ḡunwaremaile, ea wane na Anutu meḡenka more mawa kamaile.

¹⁹ Ḣo na doku tau tau magu lewa lewago don mete mane (5 ka) edanikalane wetneḡo nanmaike, yemo na yale okanbe paki, ḡei ḡerep natne miti don kito edanbe, eḡe maine detpirap, so don kuneḡine kait qetot maneo miti kiroine don ten tausen rara, eamo yeine!

Miti Aukenane Medep Nigmatne Eḡane Rokop Mi Okanikene

²⁰ Kimakop, miti wane wet dereret ḡineḡo medep nigatne eḡane wet misuk wetkekei, borikinane yemo wet dereret ḡineḡo medep nigatne eḡane wet dereret yale wetkekei. Ḣo miti wane yemo wet ḡineḡo ḡei suaine eḡane wet yale wetkekei. ²¹ Anutu wane papiao don iwa yale qeqine,

“Na ḡei lobo so ḡei don kine mane naḡane Yuda magu keuo biraonbe naḡane kine ra qelaḡan onikei, Waomḡo ramaike. Na baḡ ḡei lobo eḡane pieno motpe don edanikei. Ḣo siluḡ, eḡe baḡ naḡane don detpi wele mi okaniake.”

²² Eso masi don kuneḡine kait qotot maneo rara eaḡo yemo qelaḡ eḡane biḡek okanmaike, doku

tau tau enjane binjek mi okanmaike, no Anutu wane Miti don rara masi, eanjo yemo doku tau tau enjane binjek, qelan enjane binjek mi okanmaike.

²³ Eso doku tau tau magu koropno lewage more, don kunenine kait qotot kine mane kine mane raikewo, nei natne mi detmami, me qelan nei natne sari metkeiwo, yemo enjane raikewo, njine qelan okanmami me?” ²⁴ No njine korop Anutu wane don miti ra qelanane metpi, nei qelan mane me nei yawine mane enjane njinano umore miti yewa korop desiake, detki, yewanjo qomino kito more, wetinane kine korop qe wakonmaike. ²⁵ Eso kotino don korop motkeki pamaikewo, yewa ra wakon wareake, paki enjane umiket more Anutu menjenkaki paki ora mawaka more rayake, “I welekatne, Anutu enjane iwa njinerop gemaikewo!”

Miti Wane Lewanjenane Koto Kele Midaine Mi Lotkekene.

²⁶ Kimakopne, ea wane daleo okanikei? Njine sari lewanjenane nasowewo yewao urata njineropka korop sari lewageu menageake, mane enjane enjet menje menjen ma sariake, mane enjane miti kito njida njidan ma sariake, mane enjane miti kine rara ma sariake, mane enjane miti don kunenine kait qotot manewo rara ma sariake, so mane enjane miti don kine njine kait qotot manewo dere mai main ma sariake. Yeye kine kine iwa korop okanbi doku tau tau magu ma togole njuniakewo. ²⁷ No nei natnenjo miti don kunenine kait qotot manewo raikewo wane okane, yemo loutnenjo mi raikewo, nei etke me karewenjo raikewo. Mane raki qoeki mane rayake, qoeki mane. Eso manewo don remi, yewa

mainge njidaniake. ²⁸ No don mai main jei mane yewa mi metki zuage more jei don kunenje kait qotot maneo lewa lewan yewao rara, eamo yeine qeligeake, pakiso, enjeka bonepine Anutu olasiake. ²⁹ Jei etke me karewenjo Anutu wane don kisi raikiei, eso natne eje don ramami, yewa mazakanikiei. ³⁰ No mane eje lewa lewago metki, Anutuwo wetino don mane mosiakeo, yemo jei alakane okora don ramaikie, eje maine qeligeake, mesiake so, ³¹ njine koropjo Anutu wane don kisi maine weku weku mane ra qelingi koso mane, eje qelingi koso mane. Yale okanbi jei njerep eje mitirop okane eweke togolekiei. ³² So Anutu wane don ra qelanjagei, miti jei yewa eje don raraene ware kalukeu paki, enjene naso miti don maine raikiei. ³³ Onoka wane, Anutu eje matali qetali welaine midaka, eje peam welaine. So urataine ea koboboine ma okanmaike, njene yaleka kima weku urataze qeturage maikenane, Anutu simin kamaikie.

³⁴ Doku tau tau magu korop eje enjet miti me don okanikiei Naso yewao, njerep eje doku tau tau magu lewa lewago donene midaine mesikiei. Eje don maine mi raikiei, eje ketkele, Mose wane Ramatok Don Numaño ramaikie, ea wane kop gekei. ³⁵ No eje don mane wane kine desikiei wane raikieiwo, yemo eje mateno njakopene maine qeson ongei. Njerep mane eje magu lewa lewago don raki, gamu gamuinerop okangi mi menageake, ea masi maine mida.

³⁶ Me Anutu wane miti don ea njinano mikepka wakonge me? Me njine wekuwo Anutu wane don detkamami, jo natne mo mida me? ³⁷ Njinano

ņine maneņo eņinane detki, eņe ņei mitirop okangi so, Anutu wane don ra qelananiake, me eņinane detki eņe Asurop okaniakeo, eņe don qe ņibonmaile iwa Waom wane don yale detlukeake. ³⁸ No mane eņe don iwa kima mi mayakeo, ņei yewa eņe yaleka Waomņo kima mi okankayake.

³⁹ Ea wane, kimakopne, ņine miti kine detluke raulukkei wane sorin borin okanikei, ņo miti don kuneņine kait qotot maneo rara, ea wane numa leņ leņ mi okanikei. ⁴⁰ No ņine urata korop tegok luke modare more mau menaņgi paki wakone, koboine miti qelananinerop okane paulukeake.

15

Yesu Wie Wieinane Don

¹ Eso kima kopne, iwa yemo Sigi Maep Don Maine ņidanbe detkoi, ea waneka koso ra ņidanbe detpi! ņine sigi maep mo ma gemami pakimo yewao gesoke malipka togole okoramami. ² Sigi Maep Don yewa ņine ņidangole, ea wane ņine Anutuņo ņibuyake, ņine Sigi Maep Don Maine ņidangole, yewa malipka ma gekeiwo, me malipke mageu siuke ņibongeo, yemo mali malip wele midaine.

³ Na sigi maep Don lewine weku ningi makole, yewaka ņine ņibongole, don wele iwa yale, Kristo eņe miti don sogino mo qekoi, ea wane rokopko borikine zane turuņine seukke. ⁴ Paki eņe deņesereo birakau kaiwe karewe pa more wisikae wieke. miti don sogine mo qekoi, ea wane rokopko. ⁵ Wie more mikepka Petoro wakonkake, yewa ņo Aposolo magukoune 12 wakononge.

⁶ Pakimo njado magukoune 500 enjano wakongi nasu wekuoka kakoi. Enjano njine koropņo wisika gemami, so natņeņo mo seukkoi. ⁷ Pakimo njado koso Yakop wakonkake, ea njine koso aposolo magukoune korop wakononge.

⁸ Paulo na dokoine enjane magu kotino mi gekole, njado na qoi qoine wakon nange, nasu yewao aposolo magukoune enjano takotnange.

⁹ O, na aposolo korop enjane ketkele meene, ea wane na nejņo aposolo maine mi norakei wane, na Anutu wane doku tau tau magu engu matali qetali okanongole. ¹⁰ No na aposolo okangole, yemo Anutu wet maepinane ra more okangole.

So wet maepine ninge, yewajņo nanjano wele midaine mi okange. Midaka. Na urata gerereune makole, eajņo aposolo natne korop enjane rokop yuanmaike. So na noņomka onokanņo maw-erap, Anutu wet maepine nanjano pakane makole.

¹¹ Eso ea wane mo noņo makole, me edo makoi, ea wane don mida. Nene koropņo miti iwaka njidan okanmaine, pakimo njine kisi maep yewa dere malip kakoi.

Yesu Seu Seuņine Wiekane Nene Wiekene

¹² Iwa Kristo eņe Anutuņo seu seuņine ma wirikkaki wisikae wiekeo, njene miti don sigi maep yalewa ra njidan okanmaine. Pakimo njinane keuo njine natņeņo onoka wane seu seuņine wisikae wie wie mi pamaike ra okanmami me? ¹³ Seu seuņine wisikae wie wie welekatne mi pamaike, yale ra bisop kekeneo, yemo njene Anutuņo Kristo seu seuņine mi ma wirikkaki wieke yewa ra bisop kaikene. ¹⁴ So

Kristo eɲe Anutuɲo seu seuoɲine mi ma wirikkaki wisikae wiekeo, yemo sigi maep raraze wele midaine okaniake, so mali malipɲine yaleka wele midaine okaniake. ¹⁵ So yewaka mida, ɲene Anutu eɲe Kristo seu seuoɲine mi ma wirikkaki wisikae wiekeo, ɲene aɲazeɲo ra takot okanka more iwa yale raikene, eɲe Kristo seu seuoɲine ma wirikkaki wisikae wieke. Yale ra more Anutu wane isi ɲeikoune okanikene. Onoka wane ɲene Anutu eɲe Kristo seu seuoɲine ma wirikkaki wisikae wieke, yale ra wakongone. ɲo Anutuɲo ɲei seu seune welekatne mi ma wirikongi wisikae wiekoiwo, yemo eɲe Kristo yaleka mi ma wirikkaki wisikae wieki-rap. ¹⁶ Onoka wane ɲei seu seune Anutuɲo mi ma wirikongi wisikae wiekei yale raikeneo, yemo Anutuɲo Kristo yaleka seu seuoɲine mi ma wirikkaki wisikae wieke raikene. ¹⁷ So Anutuɲo Kristo seu seuoɲine welekatne mi ma wirikkaki wisikae wiekeo, yemo mali malipɲine wele midaine okane mi qesin ɲuniake. Pakimo ɲine borikine ɲinerop ge more midakei. ¹⁸ So Kristo detlukkau paki seukkoi, eɲe yaleka mo siuke mida leleko. ¹⁹ ɲene Kristo wane dereret ge more, kepe iwa wane gege mage ea waneka weku toma gekeneo, yemo ɲei natne qom borik okan okanmami, eɲe korop yuan one more ɲedo qom borik zok manerop okangene. Baɲ Kristoɲo ɲene mi ɲebuyake.

Seu Seuoɲine Wisikae Wie Wie Yemo Tegeoo Wiekei

²⁰ No yale mida, Kristo eḅe welekatne Anutuḅo seu seuḅine ma wirikkaki, wisikae wieke, ea mo euo kine kine mo lewine kieke wele waḅon okanmaike, yalewa ḅei seu seune pamami, eḅe alakane ebongi paki wieke, ea wane ḅei seu seune eḅe baḅ wisikae wiekei. ²¹ ḅei maneḅo seu seu kieke ḅebonge, yaleka ḅei maneḅo seu seuḅine wisikae wie wie kieke ḅebonge. ²² Adam wane ra more seuk okanmaine, yale waka Kristo wane ra more seu seuḅine baḅ korop wisikae wie warekene. ²³ So weku weku wiekenane rake, rokop wisikae wie warekene, lewine Kristoḅo alakane wieke, ea wane, ḅadino Kristo sariake, naso yewao magukoune korop wie warekene. ²⁴ Wie wareḅem mo naso qoe wareake, pakimo Kristo eḅe wawaine, ḅei waom urata, ware ware zonom gorop, so sorin borin gorop, korop ebu ket biraon wareake. Pakimo ḅei waom urataine ea mo mainge Anutu Magak maniake. ²⁵ Onoka wane, iwa yemo Kristo eḅe ḅei waom urataine ma arimage qoeki, Anutuḅo ḅaba koune korop ebu ket kinane bano biraone more lapelek on-wareake. ²⁶ Eḅe ḅabakoune natne ma ket biraon ware mo ḅaba suaine eḅe ḅado qe matali kayake yemo seu seu. ²⁷ Onoka wane Miti sogine Anutu wane Papiḅo iwa yale ramaike, “Yeye kine kine korop Anutuḅo eḅane kinane bango biraon wareke.” Don iwa yemo Anutuḅo eḅine Kristo wane bango weneḅ mi ramaike, eḅe yeye kine kine korop ebu ket more Kristo wane bango biraongane ramaike. Ea wane ḅene don iwa mo didiwo detmainane ḅene koso maine detḅem “Yeye kine kine korop,” yewaḅo Anutu wane

weneŋ mi okaniake, midakaka! ²⁸ Kristo eŋe Magakŋo qesiŋkaki yeye kine kine korop ebu ket more eŋine bango biraon warekane, Medepine eŋine yalewaka ket more Anutu wane bango geake, pakimo Anutuŋo baŋ yeye kine kine korop qopotke ware mo ea wane lewet okan wareake.

²⁹ Don iwaŋo welekatne mi okanmaikeo, yemo ŋinane keuo ŋine onoka wane ŋei natneŋo seu seune eŋane tungo, miti doku tauon okanmami? Ŋo welekatne, ŋei seu seune maneŋo mi wisikae wieakeo, yemo eŋe onoka wane seu seune eŋane tungo miti doku tauon okanmami? ³⁰ Eso ŋenzane yaleka, ŋene don isisine ea wane ra more ŋetne ŋetne kutno wikile gekoneŋo gemaine? Midakaka. ³¹ Kimakopne, na Kristo Yesu ŋenane Waomze, eŋane ra more uratanane wele ŋine okangoi ea wane wetne menaŋmaike. Don iwa welekatne. Na kaiwe baŋem ŋinane ra more seu seu maratka okanmaile. ³² Na Epeso matko gekole, eao naŋane ŋaba ŋei korop osom zubaine yale eŋerop kawali qekole. Ea sola mawa mawa wane okangoleo, yemo onoka maine mane maikale? Mane mida! Seu seuŋine wisikae wie wie mi pamaikeo, yemo yeine. So ŋei qelaŋ natne ra okanmami, iwa yale, “Ŋene ŋara so doku ne bat okanŋem. Ŋene qaeki maine seukkene. Seuŋem oŋa oŋaze siukeake. Waomze mane mi gemaike, yemo sot turuŋze mi maratkaikene!” Na don ea ramaile, wele midadaine!

³³ Ŋo ŋei natneŋo misuk isiŋunikei, “Ŋei borikine yau yaup gegine eŋerop geu, matali ŋunbi miti qeliŋgei.” ³⁴ Ŋine qelaŋ masi yeine qeliŋgei, pakimo wetŋine wisikaeki, koboboine

ge more, borikine koso mi maikei. Njinano njine natnejo Anutu njanæ kamami. Na don iwa rawe dere gamu njuniake.

Seu Seuonjine Wisikae Wie Wie Kine Mane Mane Wiekene.

³⁵ Nei natnejo iwa yale mane qesonikei. Nei seu seune eje daleo okane wisikae wiekei? Eje sola tanikene dalino ma more wiekei? ³⁶ Njine qelan nej! Njine kine kine ebot okanmami yewa yaup mi sa okanmaike, eseune gototki komine sa okanmaike. ³⁷ So njine kine kine kepeo ebot okanmami, yemo kaweunerop mi ebot okanmami. Njine segoj me wit me kine kine natne ea woune ka ebot okanmami, pakimo komine so metine njado sa okanmaike. ³⁸ Pakimo, Anutu eje detluka more tanikine ra mange, ea wane kopka sa more wakon okanmaike, wounane kop tanikine kine mane kine mane wakon okanmaike.

³⁹ Sola korop, ea wane kine yale waka wekuka mi pamaike, nej solaze eje wekuka, osom ejane solaene eje mane, nanj ejane solaene eje mane, zawon ejane sola eje mane.

⁴⁰ So qeliwane kine kine pamaike, so kepe wane kine kine. No qeli wane kine kine ejane kibiene weku, kepe wane kine kine ejane kibiene mane.

⁴¹ Kepe deinane kibiine weku, meso wane kibiine kine mane, so serekin eje kineene kine mane kine mane.

⁴² Seu seuonjine wisikae wie wie, ea wane kine yewaka pamaike. Sola kepeo dukonmaine, eajo mida midaine. Sola wisikae wiemaikenjo yemo mi midayake. ⁴³ Kepeo ebotmainejo ewine midaine,

wisikae wie wienjo qelanjnerop. Kepeo ebot-mainenjo zonomine midaine, wisikae wie wienjo zonomine gege togon gorop. ⁴⁴ Sola kepeo mot-mainenjo kepeo solarop, sola wisikae wie wienjo qeli solarop. Kepe sola pamaike yalewaka qeli sola qelanjn zonominerop pamaike.

Adam Nosa Nabo

⁴⁵ Ea wane Anutu wane Papijanjo iwa yale ramaike, “Adam alakan wakonge, enje onja onjarop okane wisikae wieke.” Nado Adam mane enje Asurop okane gege ma wakone ebo ebon ea wane welaine okange. ⁴⁶ Asu wane kine kine yewanjo alakan mi wakonge, kepe wane kine kine yewanjo alakan wakonge, njo Asu wane kine kine yewanjo njado wakonge. ⁴⁷ Alakan Adam enje kepeo njine, Anutujo kepenjo make. Nado Adam mane enje qeliwo njine. ⁴⁸ Kepeo njine nei geke, rokop yewaka kepeo njine nejikoune gemaine. Qeliwo njine nei geke, rokop yalewaka qeliwo njine nejikoune gekene. ⁴⁹ Eso njene kepenjo nei Adam make, enjane onja onjaine gemaine rokop, yale waka qeliwo njine nei Yesu ketke enjane onja onjaine gekene.

Yesu Lotkeki Kepe Gege Wane Sola Kito Qokkene

⁵⁰ Kimakopne don mane iwa rawe detpi. Solaze kepenjo mamaine yewanjo Anutu wane qeli mat gege togon mi marat kayake. So kine kine mida midainenjo geuluke, gege togon maine mi marat kayake.

⁵¹ Na don sane mane njidanbe detpi. Nene korop mi seuk warekene, njene banj koropjo kepe

solaze kito qokkene. ⁵² Naso qoi qoino romon nado arokki ikopka deze ilikitnejo kilitikmai ke, yale turenongi yale okangene. Romon arokki, nei seu seune ene gege togon wane wisikae wiekei, pakimo nene wisikaune gemainejo solaze korop kito qokkene. ⁵³ Yemo iwa yale, solaze mida midaine iwa kito qoke more ma gege togon wane yewa biranem kesiake, solaze seu seu wane binjek, iwa kito qoke more gege togon wane binjek yewa qorot nagukene. ⁵⁴ Eso solaze mida midainane binjek iwa kito qoke more, ma gege togon wane, yewa qorot nagukene, so seu seu wane binjek iwa kito qoke more solaze ma gege togon wane binjek yewa qorot nagukene. Naso yewao Miti dongo iwa yale qeqine, yewa wele okaniake, “Gege togonjo seu seu zonom korop qe ma ket biraka more qotkake.”

⁵⁵ “O seu seu, gejane zonom diawa? O seu seu, gejane wikile wakilenone diawa?”

⁵⁶ Borikinejo seu seu wane wakele so netne netne okan okanmai ke, so Rara Togon Donjo borikinane nabok pa more zonom man okanmai ke. ⁵⁷ No nene Anutu ewine kito magekene! Onjo Waomze Yesu Kristo talekaki gege wane zonom ma wakone nebongi, kawali qe more, nei borikine so enane urata korop yuanka okanmaine.

⁵⁸ Eso ea wane kima maepkopne, njine gesoke togole luke okorakei. Pakiso Waom wane urata naso banjem togole more makei. Waom wane ra more urata mau wele midaine mi okaniake, ea dere so makei.

16

Yerusalem Matko Njine Kimakopene Enjane Wesi Ma Wakonikei Wane Edange

¹ Iwa yemo, wesi natne ma qeturage more, Anutu wane doku tau tau magu enjane Yuda kepeo motpi ariakane done. Njine Yerusalem matkonjine doku tau tau magu enjane wesi mosikei wane rau paki, yemo Galatia kepeo njine doku tau tau edane mauluk okangole, njine yalewaka okanikei. ² Njine soda banjem koropno wesi soda mane kotino maratkaikei, kop bonep bonep natne mapokeu, paki mat njino more ware gekei. Eso na njado sari lotkewe, njine wesi mosikei wane urataine mi maikei. ³ Njado na sari lotkewe, yemo njidom nei natne ma wakononbi, na kibi qe ebonbe paki, taleonbe enj kibi warop njinane wesi, wetpese wane bakom ma Yerusalem arikei. ⁴ Eso na arikalane naniakeo, yemo maine ban narop wenenj arikene.

Paulonjo Enjano Ariakane Naso More Ebonge

⁵ Na Masedonia kepeoka ari nitoki, njado njinano banj ukale. Na Masedonia kepeo mikepka ari more yaup yuane ukale. ⁶ Na njinano umore naso nigatne njinerop gekale, ge wawe koya naso qoeyake mane. Pakimo banj mat maneo arikalane okanbe, njido maine qesijnanbi numa arikale. ⁷ Na yaup numaka sari njune more ikop mi yuanjnune arikale, Waomno det naniakeo, yemo na naso natne njinerop gekalane wetkemaile.

⁸ No iwamo Epeso matko gewe Asu ketkane peada bomileake. ⁹ Onoka wane, nanane miti urata mawe wele doku tau tau magu maine

loutne maine wakonikei wane, madet suaine mo Waomŋo makoke ninmaike aŋaŋmaike. So mane yemo miti wane ŋabaine loutneŋo ŋene ŋabaŋone gemami.

¹⁰ Ŋo Timoti ŋinano uyakeo, ŋine kima okankau, ŋinane keu ŋino kaet sola misuk geake. So ŋine weneŋ desikei, eŋe Waom wane urataka na mamaile, yale eŋe mamaike. ¹¹ Ea wane eŋane detpi ketkele mi okangi, ŋadekkaikei. Ŋine wet-pese okanka more qesiŋkau, numaine maineka takotke ariake, paki koso zinge naŋano sariake. Na so doku tau tau natne ŋene eŋane tomaka gemaine.

¹² Eso kimaze Apolos wane don yemo iwa yale, na atakine atakine ŋinano doku tau tau natne eŋerop ŋuniakane qebinka okanmaile, ŋo eŋe mi ewekmaike, eŋe iwaoka mida, naso maneo detki kopkeki, ŋinano baŋ uyake.

¹³ Ŋine diam ŋine maikei, pakiso mali malipko gesoke togole okorakei, so sorin borin okane togolekei. ¹⁴ Yeye kine kine korop yewa wet maepko okanikei.

¹⁵ Kimakopne, ŋine iwa Stepanas so maguk-oune eŋane mo det okanmami, eŋe Akaia ŋine, edo lewine alakane wetene mainge miti dere more, doku tau tau okangoi. Pakimo, enjene simile enane Anutu wane ŋei ŋerep magu eŋano urata suaine ma okanmami. ¹⁶ Na qebin ŋunmaile yemo ŋine ŋei yaline eŋane baneeno gekei paki, eŋe so ŋei natne miti urata ma more wikile det okanmami, eŋe onbi ŋetne kop ŋine okangei.

¹⁷ Stepanas, Potunatos, so Akaikos, eŋe naŋano sariu, na wet pesek okanmaile, onoka wane, eŋe

ɲido mi sariu, edo ɲinane tungo sari donkisi okannanimi. ¹⁸ Paki ɲine wetpese okan ɲunmami, yaleka na wetpese okannanimi. ɲine ɲei yaline enane detpi menageake.

Wetpese Don Qoiqoine

¹⁹ Doku tau tau magu Asia kepe sotno gemami, ene ɲinane kaiwe maine ra more don motpi sarimaike, Akwila so Prisila so doku tau tau magu weneɲ, erane matko lewan okanmami, magu koropɲo kaiwe maine ra more don motpi sarimaike.

²⁰ Kimakopze iwa korop ene kaiwe maine ɲinano motpi umaike.

ɲine ɲidom yale waka kimao kaiwe maine ra more lulu zam zam koboine okannagu gekei.

²¹ Nae meteneɲo kibi iwa, qem mawa okanɲune more kaiwe maine ra qemaile, na Paulo.

²² Mane ene Waom wane mi siminkaki, Waom wane soa enano payake, ene sora gerepko kesi-ake!

Grik don ra okanmami, “Maranata!” Kine iwa yale, “Waomze sarinom!”

²³ Waom Yesu wane wet menaɲo ɲinano pawareake.

²⁴ Naɲane wet maepneɲo Yesu Kristo wane ra more, ɲinano korop pawaremaike.

Waom Yesu Wane Sigi Maep Don
The New Testament in the Ono Language of Papua
New Guinea
Nupela Testamen long tokples Ono long Niugini

Copyright © 1991 The Bible Society of Papua New Guinea

Language: Ono

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-23

PDF generated using Haiola and XeLaTeX on 11 Nov 2022 from source files dated 22 Nov 2019

646541a1-8d36-5993-802c-6bb850da5963